

九本 十九之廿九二卷

十九 兀良合台子阿木 伯顏附孟祺 阿里海牙 阿剌罕祖捨徹父也柳子 塔出妻明理氏 懷都祖阿木魯

完者都 忙兀台 隋世昌父寶 李庭 朱國寶父存器 阿塔海 張禧父仁義子宏綱

張宏範兄宏畧弟宏正 李恒父惟中 李德輝附呂戴

廿 土土哈子牀元兒 洪福源父大宣子茶邱君祥 唆都子百家奴 來阿八赤附獎楫張玉

昔都兒 史弼曾祖彬 高興 亦黑迷失 劉國傑子脫歡 賽典赤瞻思丁

子細連刺丁忽辛 愛魯父昔里鈐部 信苴日 也罕的斤 忞烈 阿礼海牙

答失拔都魯 察罕帖木兒 卜顏鐵木兒

元史類編卷之十九

仁和邵遠平戒山學 南沙席世臣郢容氏校刊

功臣三 平宋

兀良合台子阿木 伯顏附孟祺 阿里海牙 阿剌罕 塔出

懷都 完者都 忙兀台 隋世昌 李庭 朱國寶

阿塔海 張禧子宏綱 張宏範兄宏畧 李恒 李德輝附呂戴

兀良合台蒙古人速不台子也世系見父傳 方憲宗為皇孫尚幼太祖以

欽察兀魯思阿孛烈兒諸部又從討平孛烈兒乃捏迷思諸部時

憲宗初立大理方結好於宋帝銳意圖宋乃命皇弟忽必烈先進

兵討西南彝以兀良合台總軍事癸丑廟碑作王子 秋馮旗西行大軍自

晏當嶺入雲南境摩娑二部長峻火脫因塔裏馬迎降冬過大渡



河至金沙江分兵入察罕章蓋白蠻也所至寨柵俱下遣其子阿
木進取龍首關從太弟入大理國甲寅廟碑作是年秋分兵取附都鄯闡
轉攻合刺章蓋烏蠻也進次羅部府大理渠長高昇泰紀作高祥志作高泰祥
集諸部兵拒戰破之決可浪山至烏蠻所都押赤城城際滇池三
面皆水險且固選驍勇以礮摧其北門縱火攻之皆不克乃大震
鉦鼓進而作作而止使不知所為如是者七日敵疲於守禦阿木
乘夜潛師躍入其城衆大潰追至昆澤擒國王段興智獻於朝師
至乾德哥城阿木環城立礮以草填塹率所部搏戰城上城遂破
乙卯攻拔不花合因阿合阿因等城及赤秃哥山寨乘勝擊破魯
厮國塔渾城又取忽蘭城魯厮國阿伯國先後請降進克阿魯山
城師行凡二載平大理五城八府四郡烏白爨爨等蠻三十七部
兵威所加無不欵服丙辰征白蠻波麗國阿木生擒其驍將獻俘


闕下詔便宜取道與鐵哥帶兒合兵遂出烏蒙趨瀘江剋秃刺蠻
三城却宋兵三萬奪其船三百艘於馬湖江通道嘉定重慶直抵
合州濟蜀江與鐵哥帶兒會丁巳雲南平遣使獻捷詔依漢故事
以西南彝爲郡縣加元良合台大元帥還鎮大理以上廟碑俱作乙卯經六盤
至臨洮與大軍合月餘復西征烏蠻秋九月廟碑作丙辰九月遣使招降交
趾不從進兵壓其境國主陳日暎廟碑作光緒隔江列象騎步卒甚盛元
良合台分軍爲三與戰蠻潰走至江駕舟逸去師入交趾越七日
日暎請內附乃還復軍押赤城元良合台病作將旋師阿木戰馬
五十匹夜爲秃刺蠻掠去分軍搜捕偵知有三寨匿馬山巔阿木
攀崖上擊破其寨盡得前後所盜馬凡千七百匹遂屠押赤城憲
宗遣使來諭約明年正月會軍長沙乃率騎兵三千蠻爨萬人破
橫山寨闢老蒼關狗宋內地宋陳兵六萬以俟阿木潛自間道衝

其中堅乘勝擊逐蹴貴州蹂象州入靜江府順流東下連破辰沅
 二州直抵潭州兵自入宋境轉鬪萬里未嘗敗北大小十三戰殺
 宋兵四十餘萬營潭城下月餘時太弟已渡江駐鄂州遣也里蒙
 古廟碑作曲里吉思領兵來援且加勞問遂自鄂北渡與大軍合後十二年
 卒廟碑作至元八年年七十一子阿朮沉幾有智畧憲宗時從父兀良合
 台征西南彝率精兵為候騎所向摧陷至平大理降交趾累著奇
 功世祖即位留典宿衛從征李壇有功拜征南都元帥治兵於汴
 至元初畧地兩淮觀兵襄陽遂入南郡取仙人鐵城等柵軍還宋
 盛兵邀襲樊間阿朮乃自安陽灘先濟留精騎五千陣牛心嶺復
 立虛寨設疑火夜半敵果至斬百萬餘級初阿朮過襄陽駐馬虎
 頭山指漢東白河口曰若築壘於此以斷宋餉道襄陽可圖也五
 年河南參政阿里海牙以兵來會遂築鹿門新城等堡繼又築臺

漢水中與夾江堡相應自是宋兵援襄者不得達六年秋大霖雨
 漢水溢宋將夏貴范文虎分遣舟師出沒東岸林谷間阿朮謂諸
 將曰此虛形不可與戰宜整兵以備新城明日貴舟果趨新城堡
 至虎尾洲追斬殆盡于是大治戰艦敎水軍築園城以逼襄陽文
 虎率舟師援貴知德安府來興國又乘勢侵百丈山阿朮與阿里
 海牙前後邀擊於灌子灘俱敗走八年文虎將衛卒及兩淮舟師
 十萬進至鹿門阿朮夾東西為陣別令一軍趨會丹灘犯其前鋒
 文虎逆戰不利棄旗鼓鎧仗遁阿朮俘其軍獲戰艦甲械不可勝
 計九年破樊城外郭宋裨將張順張貴裝軍衣百船自上流徑趨
 襄陽順被創死貴得入城俄乘水漲出輪船欲順流還郢阿朮令
 諸軍艤舟待之沿岸束荻列炬火光燭天如晝追至橫門關擒貴
 餘眾盡死先是襄樊兩城夾漢水宋兵植巨木江中鎖以鐵絙上

造浮梁通援兵樊亦恃此為固至是阿朮命以機鋸斷木以斧斷
 緇燔其橋襄兵不能達乃帥銳師截江而出遂拔樊城阿里海牙
 移攻具向襄陽城中大恐守將呂文煥降世祖本紀阿里海牙傳俱作十年事十年奉命
 畧淮東抵揚州城下宋以千騎出戰阿朮伏兵道左佯北宋兵逐
 之伏發敗去十一年正月入觀與阿里海牙共請伐宋帝命相臣
 議久不決阿朮進曰臣畧地江淮備見宋兵弱於往昔失今不取
 時不再來帝曰朕意決矣詔大徵兵與丞相伯顏南伐秋九月師
 次郢之鹽山得俘民言宋沿江九郡精銳盡聚二郢南北兩城夾
 江漢舟師出其間騎兵不得護岸危道也不若取黃家灣堡東有
 河口可由中拖船泛藤湖以達江僅三里甚便阿朮從其言遂舍
 郢去行大澤中宋騎兵突至時從騎纔數十人阿朮奮槊馳擊生
 擒郢州都統趙文義殺之進拔沙洋新城次復州時夏貴鎖大艦

絕漢津為陣兩岸戒嚴阿朮用千戶馬福計回舟輪河口穿湖中
 將從陽羅堡西沙蕪口入江軍至陽羅堡攻之不克阿朮謂伯顏
 曰攻城下策也若分軍船之半循岸西上泊青山磯伺隙擣虛可
 以得志遂乘夜遡流上二十里至青山磯宋師不知也值大雪夜
 半遙見南岸多露沙洲即率諸將徑渡載馬後隨宋都統程鵬飛
 來拒阿朮橫身喋血大戰中流鵬飛敗走諸軍登沙洲急擊攀岸
 步鬪散而復合者數四敵小却諸將出馬於岸追至鄂東門夏貴
 聞阿朮飛渡大驚引兵先遁始拔陽羅堡盡得其軍實阿朮還渡
 江與伯顏會于武磯山議兵所向或欲先取蘄黃阿朮曰若赴下
 流退無所據先取鄂漢雖遲旬日可為萬全計乃分兵水陸並趨
 鄂州焚其船三千艘煙燄漲天漢陽鄂州大恐相繼降十二年春
 黃蘄江三州降即率舟師趨安慶下池州宋賈似道擁兵蕪湖遣



宋京來請和如開慶約伯顏謂阿朮曰有詔令我軍駐守何如阿朮曰若釋似道而不擊恐已降州郡難保且宋人無信方遣使請和而又射我軍船執我邏騎今宜速進兵若有失我任其咎師次池州下流之丁家洲時似道以精銳七萬盡屬孫虎臣爲前鋒夏貴以戰艦二千五百艘橫亘江中似道將兵殿後伯顏令軍中作大棧數十採薪芻置其上陽言欲焚宋舟宋軍惟晝夜嚴備而戰心少懈伯顏分步騎夾岸進麾戰艦合勢衝宋軍阿朮與虎臣對陣舉巨礮擊其中堅虎臣軍動阿朮以划船數千乘風直進挺身登舟手斃突入敵中諸軍繼進虎臣前鋒將姜才方接戰虎臣遽過其妾所乘舟衆見之譁曰步帥遁矣軍遂亂貴不戰而走以扁舟掠似道船呼曰彼衆我寡勢不支矣似道聞之遽鳴鉦收軍舳艫顛蕩乍分乍合阿朮以小旗麾將校橫擊深入伯顏令步騎左

右倚之死者過半江水爲之盡赤似道與虎臣單舸奔揚州帝以宋重兵在維揚臨安倚之爲重命阿朮分兵駐揚州以斷宋淮南之援四月次真州敗宋兵于珠金沙乃造樓櫓戰具于瓜洲漕粟于真州樹水柵于揚子橋以絕宋糧道且爲瓜洲蔽時伯顏奉詔赴闕七月宋兩淮鎮將張世傑孫虎臣操戰艦曰黃鶴白鶴萬餘艘次焦山東每十船爲一舫聯以鐵鎖沉鐵碇于江中非有號令毋得起碇以示死戰阿朮登石公山望見舳艫連接旌旗蔽江曰可燒而走也選善射者千人載巨艦分兩翼交射阿朮居中合勢大戰自辰至午乘風以火矢燒其篷檣風急火熾宋前軍大亂猝不能起碇赴江死者數萬後軍散走追至鬪山獲白鶴子七百餘艘自是宋不能軍九月阿朮築灣頭堡姜才將步騎來攻阿朮擊走之十月拜中書左丞相帝曰淮南重地李庭芝狡詐仍須卿守

之時諸軍進取臨安獨阿朮留駐瓜洲以絕揚州之援十三年二月夏貴舉淮西諸城降阿朮謂諸將曰今宋已亡獨庭芝未下若不絕其聲援塞彼糧道恐東走通泰逃命江海乃柵揚之西北丁村以扼高寶餽運留屯新城以逼泰州更遣千戶伯顏察兒率甲騎以捍灣頭堡戒曰宋軍水路既絕必從陸出宜謹備之六月姜才聞高郵米運將至夜出步騎犯丁村比曉伯顏察兒來援所將皆阿朮牙下精兵旗畫雙赤月衆軍望見呼曰丞相來矣宋軍識其旗皆遁才僅以身免庭芝挾才東走阿朮率兵追襲庭芝入秦州秦州守將孫良臣史作孫貴胡惟孝開北門納欵庭芝才俱被執戮之揚州市乃申嚴十卒禁侵掠有武衛軍校奪民二馬卽斬以徇淮南北平九月八見陳宋俘奏先後所得江淮兩浙湖南北爲府三十七州一百二十八縣七百三十三戶九百三十七萬口一千九百

七十二萬第功行賞實封秦興縣二千戶二十三年受命北伐叛

王昔刺木等明年凱旋又西征至哈刺霍州以疾卒追封河南王

名臣事畧云阿朮聞敵所在忠勇奮發卽躍馬挺槊陷陣深入故南討北征四十年間大小百五十戰未嘗敗衄其追降生擒者皆釋而不問及處閑暇恂恂似不能言論者

冊曰自古開疆必由中土惟茲陪宋入自南阻幹腹計成積

薪厝火馴至燎原知者莫補

伯顏蒙古巴隣部人世爲其部千戶父曉古台從宗王旭烈兀開

西域遂鎮焉伯顏長於西域輟耕錄云伯顏嘗至玉闕國得一玉佛高四尺色如故

五六尺長十七步以重不可致至元初入奏事世祖見其言貌曰此非諸侯王臣也遂

留禁中恒預謀國事敕以安童女弟妻之拜中書左丞相諸曹白

事有難決者徐出一二語決定省中警服曰真宰相也十一年正

月荆湖行院阿里海牙平章阿朮入覲並請大舉伐宋帝趣召史

天澤同議天澤請以伯顏督諸軍則四海混同可計日而待帝可

其奏乃與天澤並拜中書左丞相行省荆湖時荆湖淮西各建行省天澤言號令不一或致敗事復改淮西行省爲行樞密院乃以伯顏領河南等路行省所屬並聽節制秋七月陞辭天澤至中途疾作表請專任伯顏九月甲戌朔會師襄陽分軍三道並進伯顏與阿木由中道循漢江趨郢州遇霖雨水溢無舟不能涉伯顏曰吾且飛渡大江而憚此潢潦耶召一壯士負甲仗騎而前導麾諸軍畢濟癸巳次鹽山距郢州二十里郢在漢水北以石爲城宋人又於漢水南築新郢橫鐵繩鎖戰艦密樹椿木水中下流黃家灣堡亦施杙設攻具堡之西有溪南通藤湖至漢江僅三里遣總管李庭劉國傑攻拔黃家灣堡蓋舟由藤湖入江諸將請曰郢城我之喉襟不取恐妨歸路伯顏曰用兵固有緩急攻城下策也大軍之出豈直爲此一城哉遂舍郢順流下伯顏阿木殿後十月甲子

次沙洋堡遣人招之不應會日暮風起

經世大典云軍中有李國用者能祭風風大作

伯顏命順

風掣金汁燬焚其廬舍城遂破丙寅克新城十一月丙戌下復州諭諸將不得入城違者以軍法論阿木使阿里海牙來請渡江期伯顏不答明日復來又不答阿木乃自至伯顏曰此大事主上以付吾二人可使餘人知吾虛實邪潛刻期別去乙未大軍次蔡店遣諸將往覘漢口形勢宋淮西制置夏貴以戰艦萬餘分據上游都統王達守陽羅堡荆湖宣撫朱禕孫以遊擊軍扼中流兵不得進阿木言漢口水急且有備不若回舟輪河轉取沙蕪口可入大江伯顏復使覘之貴亦以兵拒守乃趨圍漢陽聲言欲取漢口渡江貴果移兵援漢十二月丙午軍次漢口伯顏乘間遣奇兵倍道奪沙蕪口引船入輪河轉沙蕪徑入大江伯顏率戰艦踵至屯布萬騎於江北下令修攻具進逼陽羅堡遣人招之其將士曰我輩

受宋厚恩誓以死戰安有降理我宋天下如孤注輸贏在此一擲爾伯顏麾諸將力攻三日不克謀於阿朮曰彼謂我必拔此堡方能渡江此堡堅攻之徒勞汝今夜以鐵騎三千泛舟溯流西上為擣虛計詰旦渡江襲南岸已渡則急遣人來告乙卯分遣阿里海牙督萬戶張宏範等先以步騎攻陽羅堡夏貴來援阿朮出不意率軍逕渡南岸丙辰報至伯顏大喜揮諸將急攻破陽羅堡宋軍大潰貴走至白虎山諸將請追之伯顏曰吾正欲遣使宣陽羅之捷今貴走是代吾使不必追也已未師次鄂州鄂恃漢陽為蔽將戰焚其戰艦三千艘火照城中兩城大恐宋守將皆降綱目云帝使張將請殺之伯顏曰義士也釋之去江淮招討使汪立信扼吭死伯顏求其後厚卹之曰忠臣之家也遂撤宋兵分隸諸將麾下留阿里海牙以兵四萬分省于鄂規取荆湖而自與阿朮統大兵水陸東下十二年春正月癸酉朔阿朮取黃州癸未伯顏取蘄州丙戌

克江州至湖口繫浮橋以渡風迅水駛橋不成遣萬戶史弼禱於大孤山神頃之風息大軍畢渡二月壬寅朔下安慶丁未次池州宋權州事趙昴發與其妻自經死伯顏入城令具衣衾葬焉賈似道督師蕪湖遣宋京以荔子黃柑遺伯顏致書請還已降州郡願貢歲幣如前約伯顏遣千戶囊加歹同其介阮思聰經世大典作袁克已還報使語似道曰如君臣相率納土即當奏聞否則備爾甲兵以決勝負似道得書不報庚申發池州壬戌次丁家洲似道都督諸路軍馬號百萬以夏貴孫虎臣為前鋒迎敵伯顏命左右翼率騎兵夾岸進萬弩齊發阿朮操戰艦擣其中堅擊以巨礮宋軍大潰似道東奔揚州甲子師至太平無為鎮巢和州諸守將相繼迎降庚午師次建康之龍灣大賚將士三月癸酉宋建康守將以城降鎮江寧國江東淮西州郡以次歸順時江東大疫且饑伯顏開倉賑之

兼遣醫治疾民大悅帝諭伯顏按兵遣國信使廉希賢等詣宋行至廣德軍為宋人所殺帝聞之怒趣進兵宋遣都統洪模移書言殺使之事太皇太后及嗣君皆不知實邊將罪願輸金幣請罷兵伯顏曰彼為譎詭計以伺我虛實耳當擇人同往宣布威德令彼速降乃遣議事官張羽至平江宋人又殺之四月帝下詔以時方暑不利行師俟秋高再舉伯顏奏曰宋人據江湖如獸保險今已扼其吭電擊風馳取之恐後少縱則逸而逝矣帝語使者曰將在軍不從中制兵法也宜從丞相請五月復召伯顏赴闕七月見帝于上都進位右丞相伯顏辭曰阿朮功多臣宜居後帝以阿朮為左丞相伯顏受命還行省付以詔書俾諭宋主乃取道益都行視沂州諸軍調淮東元帥孛魯歡一作博羅歡阿里伯以所部兵沂淮而進九月庚辰會師淮安城下伯顏親臨南城堡揮諸將長驅而登平

其南堡丙戌次寶應戊子次高郵十月圍揚州召諸將指授方畧留博魯歡阿里伯守灣頭新堡眾軍南行至鎮江十一月乙亥伯顏分軍三道期會臨安阿剌罕等為右軍以步騎自建康出四安趨獨松嶺董文炳等為左軍以舟師自江陰循海趨溲浦華亭伯顏及阿增海由中道節制諸軍水陸並進壬午伯顏軍至常州先是常州守判以城降既而都統制劉師勇與張彥王安節等復據之伯顏射書城中謂勿以已降復叛為疑不應遂叱帳前軍登南城豎赤幟城上諸軍見之大呼曰丞相登矣師畢登宋兵大潰屠其城續資治通鑑長編云伯顏命役城外居民運土為壘土至并人以築之且殺民煎膏取其油作礮及城破盡屠其民惟七八人伏橋坎獲免師勇變服奔平江諸將請追之伯顏曰但令師勇所過城守者膽落矣遣萬戶懷都先據無錫州忙古歹巡太湖庚寅遣降人游介實奉詔書副本使宋仍以書諭宋大臣十二月辛丑次無錫宋將作監柳岳等奉幼

主及謝太后書併宋大臣與伯顏書來見垂泣曰太皇太后年高嗣君幼且在衰經中自古禮不伐喪乞班師敬如約進奉修好今日事至此者皆奸臣賈似道失信誤國耳伯顏曰主上即位之初奉書修好汝國執我行人一十六年所以與師問罪去歲又無故殺害信使過將誰歸如欲我師不進將效錢氏納土乎李主出降乎爾宋昔得天下於小兒之手今亦失於小兒之手蓋天道也輯

錄云宋之興始於後周恭帝顯德七年恭帝方八歲及亡終於少帝德祐元年少帝時四歲名顯而顯德二字竟與得國時合周以主幼失國宋亦以主幼失國周有太后在宋亦有太后在始終昭然如此甲辰軍次平江宋遣尚書夏士林侍郎呂師孟右史陸秀

夫奉書稱姪請和不許癸亥伯顏發平江以忙古歹范文虎行兩浙大都督事取湖州十三年正月己巳克嘉興乙亥宋宰臣陳宜中遣御史劉岳易宋主稱臣表副本且致書伯顏約面議降事辛巳軍至崇德壬午次長安鎮宜中違約不至癸未進屯臨平鎮甲

申次臯亭山宋遣知臨安府賈餘慶奉傳國璽及降表詣軍前伯顏受訖乙酉軍至臨安北十五里分遣董文炳呂文煥范文虎閱視城堡俄聞降將洪模來報宜中與張世傑劉師勇等挾宋益王昞廣王昺下浙江航海去伯顏亟遣勁兵追之不及宋謝后遣丞相吳堅文天祥樞密謝堂來見伯顏顧天祥舉動非常疑有異志留之軍中天祥數請歸伯顏曰勿急君為宋大臣責任非輕今日之事正當與我相其令館伴羈縻之遣餘慶還易宋主削帝號降表已丑駐軍臨安城北湖州市遣囊加歹先以傳國璽入獻庚寅伯顏建大將旗鼓率左右翼萬戶巡臨安城觀湖浙江宋宗室大臣來見宋主易稱臣降表及諭未附州郡手詔至令鎮撫唐古歹罷遣天祥所募義兵二萬餘人壬辰伯顏登獅子峯觀臨安形勝命峻都撫諭軍民部分諸將共守城護宮分宋三衙諸衛兵於各

翼以俟調遣其新募軍願歸者聽遣降將招諭浙東嚴婺衢信諸
州二月庚子宋主率百僚望闕拜發降表伯顏承制以臨安爲兩
浙大都督府忙古歹范文虎始入治府事復命張惠等籍宋軍民
錢穀數閱實倉庫收百司符印告敕罷官府移宋主居別宮禁軍
民不得侵壞宋氏山陵癸亥謝后命吳堅賈餘慶謝堂家鉉翁劉
岳與文天祥並充祈請使楊應奎趙若秀爲奉表璽官赴闕請命
伯顏拜表稱賀曰國家之業大一統海岳必明主之歸帝王之兵
出萬全昧弱敢天威之抗始于戈之爰及迄文軌之會同區宇一
清普天均慶恭惟皇帝陛下道光五葉統接千齡梯航日出之邦
冠帶月支之域際丹崖而述職奄瀚海以爲家獨此昏愚弗遵聲
教謂江湖可以保逆命舟楫可以敵王師連兵負固逾四十年背
德食言難一二計當聖主飛渡江南之日遣行人乞爲城下之盟

逮凱奏之言旋輒詐謀之復肆拘囚我信使忘乾坤再造之恩招
納我叛臣盜漣海三城之地我是以有六載襄樊之討彼居然無
一介行李之來禍旣出於自求怒致開於斯赫臣等肅將禁旅恭
行天誅爰從襄漢之上流復出武昌之故渡藩屏一空於江表烽
烟直接於錢塘尚無度德量力之心洵有殺使毀書之事屬廟謨
之親稟謂根本之宜先乃命阿剌罕取道獨松董文炳進師海渚
臣與阿瑒海泰司中閫直指僞都犄角之勢旣成水陸之師並進
常州已下列郡傳檄而悉平臨安爲期諸將連營而畢會彼知窮
蹙迭致哀鳴始則有爲姪納幣之祈次則有稱藩奉璽之請顧甘
言何益於實事率銳卒直抵於近郊召來用事之大臣放散思歸
之衛士崛起雄心在四郊之橫草都無飛走計窮一片之降旛始豎
臣奉揚寬大撫戢吏民九衢之市肆不移一代之繁華如故茲惟

睿算卓冠前王視萬里如目前運天下於掌上致令臣等獲對明
 時歌七德以告成深切龍庭之想上萬年而為壽敬陳虎拜之辭
 謹奉表稱賀戊申堅等發臨安真貴以淮西來降三月丁卯伯顏
 入臨安俾孟祺籍宋禮樂祭器冊寶儀仗圖書庚午召伯顏偕宋
 君臣入朝伯顏留阿剌罕董文炳治省事俾經畧閩粵忙古歹以
 都督鎮浙西峻都以宣撫鎮浙東而自護宋君臣北上西浙平凡
 得府八州六軍一縣八十一戶二百九十八萬三千六百七十二
 口五百六十九萬二千六百五十七乙亥伯顏發臨安宋主母后及
 福王與芮而下官屬從行者數千人五月伯顏以宋主至上都帝
 御大安閣受降命伯顏告天地宗廟大赦天下帝勞伯顏拜同知
 樞密院事以陵州滕州戶六千為食邑先是太宗曾孫海都者世
 居北方常為邊患帝封皇子南合為北平王統軍鎮其地既而

諸王昔里吉劫北平王以叛仍命伯顏討之過于幹魯歡河夾水
 而陳相持終日伺少懈麾軍為兩隊掩其不備破之昔里吉走死
 十八年二月命從燕王真金撫軍北邊帝曰伯顏才兼將相忠於
 所事故俾從汝不可以常人遇之當伯顏之還朝也詔百官郊迎
 平章阿合馬先詣官道謁伯顏解所服玉鈎條遺之阿合馬謂其
 輕已乃誣以平宋時私取玉桃蓋帝察之無驗至是有獻此蓋者
 帝愕然曰幾陷我忠良二十二年秋宗王阿只吉失律詔伯顏代
 總其軍邊兵嘗乏食伯顏令軍中採葭怯葉兒及藟敦根人各貯
 四斛草粒稱是盛冬雨雪人馬賴以不饑諸王乃顏者烈祖元孫
 也素蓄異志或告乃顏反命往覘之伯顏多載衣裘入其境輒以
 與驛卒既至乃顏設宴謀執之伯顏覺與其從者趨出分三道馳
 歸驛人以得衣裘故爭與健馬得脫還白狀乃顏果反帝親征伯

顏奏李庭董士選將漢軍爲前鋒乃顏黨金家奴塔不台進逼乘
與漢軍力戰乃顏卒就擒二十六年進知樞密院事鎮和林和林置
知院白
此始二十九年宗王明里鐵木兒附海都叛詔伯顏往討遇于阿撒
忽秃嶺矢下如雨伯顏令曰汝寒君衣之汝饑君食之政欲効力
此時爾於此不勉將何以報麾諸軍進後者斬伯顏先登陷陣諸
軍爭奮明里鐵木兒敗走軍中獲謀者伯顏遣資書明諭以禍福
明里鐵木兒得書感泣來降未幾海都復犯邊留伯顏拒守廷臣
或譖其久居北邊與海都通好帝以御史大夫玉昔帖木兒代之
伯顏居大同俟命三十年冬驛召至京世祖崩伯顏總百官以聽
成宗將立親王有違言伯顏握劍立殿陞陳祖訓宣顧命辭色俱
厲諸王股栗趨下拜加伯顏太傅錄軍國重事江南三省累請罷
行樞密院帝問於伯顏時已屬疾張目對曰內而省院各置爲宜

外而軍民分隸不便遂罷湖廣江西江淮三院事歸行省冬十二
月丙申有大星隕東北兩木冰庚子卒年五十九大德八年加封
淮安王諡忠武延佑初詔立祠杭州給田以供祀事 孟祺字德
卿宿州符離人當伯顏伐宋授祺爲行省諮議諸將爭趨臨安伯
顏問計祺曰若以兵相追宋必竄閩一旦盜起臨安三百年之積
焚蕩無遺矣莫若以計安之令彼不懼正如取果稍待時日耳伯
顏從其言祺自請爲使徵降表至宋取宋國璽十二枚出伯顏將
親封之祺曰管鑰自有主者非所宜親一有不謹恐異時姦人妄
相染汚終不可白遂止伯顏奏祺前後功累官浙東按察使

冊曰宋運已阨特簡斯人摧枯拉朽若風掃塵惟遵弗殺爲
時曹彬忠能致主澤在保民


阿里海牙

編曰

作涯畏吾兒人初生胞中剖而出父以爲不祥將棄之

母不忍比長聰辨有膽畧家貧嘗躬耕舍耒歎曰大丈夫當垂功
竹帛何至槁項馱馱去求北庭書讀之一月而盡用薦者得事世
祖漸見擢用姚燧神道碑云大將十都吉勝薦其忠謹得宿衛從濟江帝射虎未殞海
淮捨馬授之衝殺之攻鄂先衆而登禽一人還流矢貫喉由項帝勇之出
左右司郎中遷參議中書省事至元五年命僉河南行省事與阿
朮劉整取襄陽始帝之遣諸將也命母攻城但圍之以俟其自斃
乃築長圍起萬山包百丈楚山盡鹿門堡俾南北不相通又築峴
山虎頭山為一字城聯亘諸堡為必取計城中糧儲多呂文煥拒
守五年終不下九年三月破樊城外郭其將復閉內城堅守阿里
海牙以為襄陽之有樊城猶齒之有唇也宜先攻樊城樊下則襄
陽可不攻而得乃入奏帝報可會西域人獻新礮法挾之來軍中
為礮攻樊破之先是宋兵作浮橋以通襄陽之援阿里海牙發水
軍焚其橋襄援不至城乃拔詳阿
水傳既而移攻具向襄陽一礮中其

譙樓城中洵懼多踰城降者阿里海牙身至城下與文煥折矢為
誓文煥感而出降遂與入朝帝以阿里海牙行荆湖樞密院事鎮
襄陽因奏自古荆襄用武之地今漢水上游已為我有宜乘勝順
流長驅宋必可平會阿朮入覲力贊其議詔益兵十萬拜伯顏為
行省左丞相阿朮為平章阿里海牙進右丞同伐宋十一年九月
會師襄陽遂破郢州及沙洋新城師由沙蕪口入大江宋夏貴守
諸隘甚固阿里海牙麾兵攻武磯堡貴趨援阿朮遂以兵西渡青
山磯鄂州降伯顏與諸將會鄂城下議曰鄂襟山帶江為江南要
區且兵糧皆備今蜀江陵岳潭皆未下不得一大將鎮撫其地上
流一動則鄂非我有矣乃分兵四萬遣阿里海牙戍鄂州而自與
阿朮將大兵東下阿里海牙集鄂民宣上德意禁將士毋侵掠民
大悅遣人徇壽昌信陽德安諸郡皆下阿里海牙言江陵地居上



流宋倚之為重鎮若非乘此破竹之勢取之待江水泛溢鄂漢之
 城恐亦難守帝從其請進徇江陵與宋鄂州安撫高世傑遇于洞
 庭湖兵船成列而陣阿里海牙督諸翼水軍屯東岸而自帥兵左
 右夾擊世傑敗走追至桃花灘力屈而降誅之遂下岳州至江陵
 縱火焚其柵宣撫朱禩孫制置高達恐即以城降遂入城釋繫囚
 放戍券軍除其徭役及法令之繁苛者傳檄歸峽常德鼎豐隨辰
 沅靖郢復均房施荆門及諸獠峒無一梗阻以江陵地圖來上請
 曰荆州西距梁益南控交廣據江淮上游為要地非朝廷重臣開
 大府以鎮之未足以收新附來遠人帝覽奏喜語近臣曰伯顏兵
 東下阿里海牙以孤軍戍鄂朕方憂之恐荆蜀連兵順流猝至今
 荆南既定吾東兵可無後患矣即命右丞相廉希憲出鎮江陵促
 阿里海牙急還鄂且以沿江諸城新附者委之比至鄂為書詔潭

州守帥李芾不聽因決隍水部分諸將以礮攻破其木堡流矢中
 胸創甚督戰益急奪其城潭人復作月城拒守十三年正月芾刃
 屈自殺諸將欲屠城阿里海牙曰是州生齒百萬若悉加屠戮非
 上諭伯顏以曹彬不殺意其屈法生之復發倉以食饑者由是郴
 全道桂陽永衡武岡寶慶袁韶南雄諸州郡守臣皆率民來迎曰
 聞丞相體上帝好生之德所過秋毫無犯民今復見太平各奉表
 降獨宋知邕州馬瑩守靜江不下阿里海牙貽書許以廣西大都
 督瑩焚書斬其使靜江以水為固乃築堰斷大陽小溶二江以遏
 上流決東南地以涸其隍城破瑩被執阿里海牙以靜江民易叛
 非潭比悉坑之斬瑩于市分遣萬戶脫温不花狗賓融柳欽橫邕
 慶遠齊榮祖狗鬱林貴廉象脫隣狗濬容藤梧皆下宋特磨道主
 儂士貴南丹州牧莫大秀皆奉表求內附奏官其土官分兵戍諸

要害自還潭州既而宋二王稱制海中雷瓊全永與潭屬縣民文才喻周隆羅飛賀十二成起兵應舒黃蘄相繼亦起詔命討之且畧地海外阿里海牙既誅才喻等至雷州使人招諭瓊州安撫趙與珞不聽遂自航海五百里至白沙口執與珞冉安國黃之紀宋史裂殺之盡定瓊南寧萬安吉陽諸地降八番羅甸諸蠻以其長文龍兒入見置宣慰司十六年入覲獻金三千五百兩白金五萬三千兩南臺御史大夫相威檢覈阿里海牙所俘男婦得萬二千餘口帝令盡放為民相威復奏阿里海牙占降民一千八百戶為奴自置吏責其租賦阿里海牙謂征行所得帝曰如果降民宜速還省鄂州所定荆南淮西江西海南廣西之地得州凡五十八峒

祀焉

碑云初籍民田租畝取三升盡除宋他名徵後征海南度不足於用始權抽戶調三之一時以為虐然較江浙諸省繁增倍徙獨西南賴以輕平

二十一年

四月親行海濱收集占城潰卒同鎮南王脫歡征交趾敗其兵于萬劫江還朝加湖廣左丞相自陳其功比伯顏當賜養老戶御史滕魯瞻劾其矜功邀賞阿里海牙自辨有旨逮魯瞻赴行臺質問相威曰為臣敢爾欺誑邪御史何罪奏釋之未幾卒追封楚國公諡武定後桑哥專政遣其黨要束木鉤考荆湖錢穀乃籍其家貲送至京

阿刺罕札刺兒氏

虞集世勳碑作孫都思氏

祖撥徹父也柳干皆有戰功死於陣

部軍擊破阿藍答兒渾都海之兵於昔門禿追至河西而還從伐

朱伯顏與阿木會師襄陽命阿刺罕率諸翼軍攻郢復二州奪郢

之南門堡復帥騎倍道兼行拒守沙蕪口入江取鄂州東畧壽昌

得米四十萬斛充軍餉統左翼軍順流東下沿江州郡悉降拜參知政事鎮建康伯顏還取臨安分軍三道並進阿刺罕由西道趨溧水溧陽攻破銀樹東壩至護牙山慶豐圩歷敗宋師由建平縣進取廣德軍先是宋廣德守張濡殺國信使廉希賢等及阿刺罕軍次安吉州濡率兵遁走追斬之宋降伯顏受詔赴闕留阿刺罕同左丞董文炳治省事旋命攻浙東漸入閩招降蒲壽庚于泉州追襲宋秀王趙與畢一作至福州與宋軍轉戰四十里斬步帥李世達于陣殲其軍獲秀王及其弟與慮子孟備皆不屈死降部曲淮卒三千人江南平授江東宣慰使尋拜行省左丞相統諸道兵四十萬征日本行次慶元卒于軍

步騎趨漣州攻破射龍溝五港口鹽場白頭河四城尋移淮西合城正陽以扼淮海宋將陳奕屢率安豐廬壽等州兵撓其役塔出選精銳且戰且築城成宋復造戰艦于六安謀攻正陽塔出覘知之率騎焚其艦餽久不繼潛取安豐麥以餉軍復出奇兵敗宋師于橫河口朝議淮上諸郡為宋北藩籬城堅兵精攻之難猝下徒老師無益宜先渡江剪其根本留兵淮甸絕其聲援則長江可乘虛而渡於是命塔出為淮西參政取安豐廬壽諸州宋夏貴帥舟師十萬圍正陽決淮水灌城幾陷帝遣塔出往救道出潁州遇宋兵攻賴戍卒僅數百人時盛夏塔出權發官庫弓矢驅市人出戰預度賴之北關攻易破急徙民入城伏兵以待宋果夜焚北關火光屬天塔出率眾從暗中齊射宋軍退敗之于沙河明日長驅抵正陽時方霖雨突圍入城堅壁不出俄天霽乃與右丞阿塔海

分帥銳師渡淮至中流死戰宋軍潰正陽圍解從伯顏以舟師與
宋戰丁家洲賈似道敗奔揚州遂分兵四出克池州取太平順流
下建康丹徒江陰常州皆望風迎降十三年命領淮西行省事時
沿淮諸州新附至則禁侵掠撫瘡痍練士卒備姦宄境內帖然俄
遷江西都元帥征廣東所至溪峒納款廣東平再遷江西宣慰使
宋益廣二王走保嶺海復改宣慰爲行省移治贛州命張宏範李
恒呂師夔出師嶺海以塔出留後供軍餉初江西甫定帝命隳其
城塔出表言豫章諸郡皆瀕江爲城霖潦泛溢無城必至墊溺隳
之非便降附之初有謀叛者旣敗獲塔出謂同僚曰此撫治乖方
所致也止誅渠魁盡釋餘黨瑞州張公明愬左丞呂師夔謀不軌
塔出廉知其誣曰狂夫欲脅求貨耳若遽聞朝廷則大獄將起連
及無辜且師夔旣承行省詎肯妄圖若遲疑不決恐彼驚疑反生

意外乃斬公明而後聞帝是之十七年入覲卒于京年僅三十七
妻明理氏以貞節旌次子泌宰牙仕至征東行省左丞妻伯牙倫
郡王孛魯歡女亦守義有賢行

懷都幹魯納台氏祖阿朮曾與太祖同飲渾河水總大軍伐遼東
諸部後討西夏大戰于合刺合察兒擒其主太祖盡賜以夏主遺
物授蒙古軍千戶尋老以子不花襲中統二年不花卒子幼懷都
以兄子繼其職李璫叛從親王哈必赤圍濟南璫四面衝突求出
懷都直前奮擊璫退走入城璫誅第功居最至元初授山東統軍
使從征襄陽西渡漢江宋遣水軍截歸路懷都選士卒浮水殺宋
軍奪其戰艦軍次淮南天長至五河口與宋兵戰屢敗之命守鹿
門山白河口一字城進攻樊之古城堡堡高七層懷都夜勒士卒
親冒矢石奪之襄陽旣降帥師屯蔡息還城正陽宋夏貴來攻逆

戰退之遂畧地安慶北渡至桐江堡敗宋軍三千餘已復南渡江
駐兵京口謀知宋平江軍出常州懷都率千人至無錫與宋兵遇
大戰殲其衆命領軍護焦山江岸仍往揚州灣頭立木城以兵戍
守未幾還守鎮江從右丞阿瑒海攻常州宋兵自平江來援懷都
提兵至橫林店與之遇奮擊大破之直取秀州已復同元帥張宏
範狗温州撫治迤東新附軍民授浙東宣慰使討台慶叛者戰于
黃奢嶺又戰于温州白塔屯寨所至輒克累官行省參政卒于處
州不花子忽都合兒既長分襲千戶從平宋有功授浙西招討使
完者都欽察人廣額豐頰長過腹驍勇而樂善好施聽讀史聞
忠良則喜遇姦諛則怒以材武起家從世祖攻鄂州先登已從阿
朮圍襄樊攻沙洋新城由沙蕪口渡江入臨安下揚州皆有功江
南平入見帝顧謂侍臣曰真壯士也賜名拔都魯至元十七年漳

元史卷一百一十九

卷一百一十九

七

補葉山房

州民陳桂龍及其兄子陳弔眼有衆數萬劫掠汀漳間據高安砦
命完者都往討加福建征蠻都元帥面慰遣之許便宜行事時建
寧賊黃華亦聚黨三萬號頭陀軍勢尤猖獗完者都先引軍壓其
壘賊驚懼乞降明日勒諸軍大獵以耀武令華等縱觀之適一鵬
翔空中完者都引弓仰射鵬應弦而墜華大懼服乃聞于朝請與
俱討賊制授華征蠻副元帥軍行悉以咨之華遂爲前驅導副元
帥高興進兵連破其五寨追擒弔眼于千壁嶺斬首漳州市餘黨
悉平桂龍率衆來降詔流之邊地入朝拜江浙左丞初浙西私鹽
盛行吏莫能禁至則案行松江上海收鹽徒五千隸軍籍久之遷
江西行樞密院副使卒于官大德二年追封林國公諡武宣子十
四人皆仕孫二十四亦多貴顯者

按列傳第十八卷有完者都第二十卷又有完者拔都魯其文大同小異蓋一人誤分爲二者

傳稱賜名拔都魯拔都之名重出蓋沿誤于此

元史卷一百一十九

卷一百一十九 功臣三

七

補葉山房

忙兀台一作忙古夕蒙古達達兒氏事世祖為博州路總管至元八年授鄧州蒙古萬戶治水軍千萬山南岸大軍攻樊城分軍為五道忙兀台當其一率五翼軍以進焚南岸舟監雲梯于北岸登櫃子城奪西南角入城命步將據倉粟功在諸將右從伯顏阿木南征命與萬戶史格率麾下會鹽山嶺遇宋兵忙兀台突陣先入諸軍繼進戰敗之自鄧州黃家原盪舟入藤湖至沙洋堡立礮座十有二焚其樓櫓拔羊角壩直抵新城將由漢口入江至蔡店聞宋兵屯漢口乃率舟師經鬪龍口至沙燕以八次武磯堡宋將夏貴堅守不下阿木率忙兀台等軍乘雪夜泝流西上黎明至青山磯北宋將程鵬飛拒戰中流被七創敗走尋招降之又諭蘄黃安慶池州諸郡皆下師次丁家洲宋將孫虎臣來拒追擊之奪虎臣所乘巨舟已攻常州拔其木城擊叛將趙潛于豐登莊復招降湖州行省

第其功命行兩浙大都督府事會宋二王逃入海詔與左丞唆都

行省福州填撫沿海八郡

經世大典云宋將王用來降言是已死世傑等復立昺于洲洲其地無糧儲聞瓊州守臣欲給糧二萬石海道灘水淺急難轉運止有本磊浦可通舟忙兀台聞其言即命諸將以兵守之尋召赴闕進左丞初忙兀台北還唆都行

省福建一日帝召唆都還命忙兀台暫往福州俟唆都至將移鎮

潭州中書言唆都在福建麾下擾民致南劍等路往往殺長吏叛

及忙兀台至招來七十二寨建寧漳汀稍獲安集有旨仍留鎮閩

時宣慰使王剛中以土人饒於賞頗擅威福忙兀台慮有變奏移

之他道久之遷江淮平章先是宋降將五虎陳義嘗助張宏範擒

支天祥助完者都討陳弔眼又阿塔海征日本資以戰艦三千省

臣或言義有反側意帝使忙兀台察之至是攜義入朝保其無他

且乞寵以官爵乃授義同知廣東道宣慰司事有譖忙兀台於帝

者逮至闕封其家賞遣使按驗無狀復拜行省左丞相移鎮江浙

上言瀕海之民多鬻私鹽專利今征日本可募爲水工役旣罷請以戰艦付海漕又言省治在杭州其兩淮江東財賦軍實旣南輸至杭更自杭北上徒勞頓非便揚州地控江海請移省治於此宿重兵鎮之且轉輸無往返勞復言淮東近地宜大興屯田歲入糧給軍所餘仍餉京師帝悉從之詔江淮管內並聽節制時行省已罷相銜以忙兀台所統地廣事繁獨授江淮行省右丞相屢以病求罷賜歸未幾復命出鎮江西到官四十日卒方在浙時專悞自用屢易置戍卒屯田無成平章不憐言台言其變亂成法帝每戒敕又嘗以私忿逼死行臺中丞劉宣事聞追卹之典闕焉

隋世昌其先登州棲霞人父寶徙居萊陽金末隸軍伍主帥奇其貌以爲管軍都總領太宗下山東寶來歸授萊州節度判官世昌其四子也身長八尺銀渾鐵爲鎗重四十餘斤能左右擊刺選

隊長宋兵犯海州戰却之進攻漣水軍先登身被數創衆從之克其城擢馬軍千戶中統初漣水復叛歸宋世昌軍于東馬寨屢擊敗宋兵遷淄萊萬戶府副都鎮撫守萬山堡轉管軍千戶會元帥劉整築鹿門使世昌董其役樊城出兵來爭且拒且築不終夜而就復令立礮簾于樊城欄馬墻外夜大雪城中矢石如雨軍校多死傷達旦而礮簾立宋列艦江上世昌乘風縱火燒其舩百餘樊城出兵鏖戰欄馬墻下世昌流血滿甲勇氣愈倍樊城竟破引兵由黃澗堡入漢江破沙洋攻新城世昌坎其城先上中數矢傷臂兜鍪皆裂昏眩墜地少蘇挺鎗復進遂下新城明日丞相伯顏視所坎城高一丈五尺第功爲最從戰丁家洲又從圍揚州世昌絕其糧道兼搜湖泊宋兵聞鐵鎗名不敢近揚州平充四城兵馬使從平章阿朮入見授管軍總管戍揚州擊下野人原司空山等七

塞進安撫使鎮澉浦授管軍萬戶世昌前後數百戰遍體皆金瘡
竟以是疾卒加封定海郡侯諡忠勇

李庭小字勞山本金蒲察氏金末來中原改稱李氏家濟陰徙壽
光世祖至元初以材武選隸軍籍權管軍千戶從伐宋宋將呂文
煥來攻萬山堡萬戶張宏範方接戰庭單騎橫槍入陣刺殺二人
槍折倒持柄擊一人墜馬庭亦被二創復奪後軍槍力戰敗之除
益都新軍千戶與宋兵戰襄陽城下追奔逐北直抵城門流矢中
左股繼攻樊城外郭礮傷額及左右手奪其土城進攻襄陽東堡
礮傷右肩焚其樓破一字城大軍攻樊城庭運薪芻土牛填城濠
立雲梯城上矢石如雨庭屢中礮墜城下絕而復甦裹創再登如
是者數四從伯顏發襄陽攻郢州與總管劉國傑先登拔黃家灣
堡盪舟入湖攻沙洋新城矢傷左脇破其外堡復中礮墜城下矢

貫胸氣垂絕伯顏命剖水牛腹納其中良久乃甦累功授萬戶師
次漢口宋夏貴領戰艦橫截江面軍不得前乃用庭計由沙蕪口
入江武磯堡四面皆水庭決其水攻之大軍徑渡江武磯堡亦破
從阿朮轉戰至鄂州順流東下與宋孫虎臣戰丁家洲奪船二十
餘宋兵斷真州江路庭焚其舟聞貴欲由太湖援臨安亟出兵逆
戰敗之裕溪口諸軍至臨安宋主降伯顏命庭等入護內城收集
符印珍寶仍令庭與阿增海護宋主至上都世祖嘉其勞賜金珠
衣各一諭曰汝在江南已多出死力男兒立功要在西北今有違
我太祖國憲者汝往征之卽加漢軍都元帥駐軍河西擊走叛臣
霍虎追至大磧而還又襲禽叛王昔里吉脫脫木兒啟皇子只必
帖木兒賜之死復引兵會諸王納里忽渡塔迷兒河殲其餘黨河
西悉平入朝賜益都居第單河官莊以父歿歸宗土乃顏叛驛名

至上都統諸衛漢軍從帝親征其將塔不台金家奴來拒戰擁眾
 號十萬帝親麾諸軍合圍庭調阿速軍繼進流矢中胸貫脇裹創
 復戰帝遣止之方已庭策乃顏當夜遁乃引壯士持火器夜入其
 營燬發敵驚潰自相蹂躪死者亡算帝問何以知之庭曰兵雖多
 無紀律見車駕駐此不戰必疑有大軍繼至是以知其將遁既而
 乃顏被擒帝南還庭又親縛塔不台金家奴以獻乃顏黨哈丹禿
 魯干復叛于遼東詔庭往討大小數十戰弗克庭整軍再戰流矢
 中左脅及右股追至一大河選銳卒潛負火礮夜泝上流礮發馬
 皆驚逸大軍潛於下流畢渡天明將戰其眾無馬遂敗哈丹禿魯
 干走死進拜尚書左丞商議樞密院事成宗嗣位眷遇尤至每進
 食必分賜武宗以皇子出鎮北邊庭請從成宗憫其老不許俄有
 旨拘漢軍馬濟北軍且令焚其鞍轡行糧諸物庭因感疾疾稍間

扈從至上都卒至大二年追封益國公諡武毅

冊曰喑鳴叱咤敵人辟易蓋裂胸穿銳進不息惟李惟隋萬
 夫之特數瀕死亾卒正床第有命自天何必縮澁

朱國寶其先徐州人後徙寶坻父存器歷官修內司使嘗夜行盧
 溝橋獲金一囊坐待其主至還之世祖攻鄂州國寶攝千戶率銳
 卒於中流遇宋師凡十七戰諸軍始畢濟從征襄陽督造戰艦築
 萬山堡及拔沙洋隳新城皆有功初師次江上國寶願當前鋒奪
 船二十艘以獻伯顏壯之宋據上流方舟數百結為堡柵伯顏指
 示曰而復能奪取是乎國寶即奮往破其柵既渡江下鄂漢進兵
 臨岳州與宋戰于桃花灘獲其將高世傑已統蒙古諸軍鎮常德
 知安撫司事時湖南既降惟辰沅靖鎮遠未下宋將李信李發結
 武岡洞蠻分據扼塞國寶擊敗之其眾退保飛山之新城思播蠻

元史卷一百一十九
來援國寶復戰破之獲信發等獻俘江陵會諸道兵攻拔廣西靜
江授管軍萬戶鎮梧州初宋臨安之破也張世傑挾二王由閩蹈
海衆復滋蔓時南恩新州何華張翼謀舉兵興復國寶擊殺之降
其民三萬餘戶遷海北海南道宣慰使蚤賊連結鬱林廉州諸洞
恣剽掠復討平之渠長任龍光等率所部五千戶降尋移瓊州立
官程更弊政訓兵息民具有調制南寧謝有奎負固不服國寶開
示信義有奎感悟以其屬來歸於是黎峒民降者三千戶苗軍降
者三十所破臨高蠻寇招降居亥番毫銅鼓博吐桐油等十九洞
遣兵畧大黎密塘橫山焚其巢生致大鍾小鍾諸部長十八人進
廣西西道參政以軍事至贛州卒于傳舍
阿塿海遜都思人祖塿海拔都魯嘗從太祖同飲渾河水以功授
千戶阿塿海早歲襲職憲宗初從大帥兀良合台征雲南身先陷

陣師還事世祖於潛邸至元九年命督諸軍攻襄陽拜中書右丞
行樞密院事分兵解正陽之圍遂渡江與伯顏軍合克池州由建
康抵鎮江時眞泰諸城尚爲宋守鎮江地扼襟喉城壁不固阿塿
海先立木柵爲保障計繼分兵屯瓜洲以絕揚州之援宋張世傑
孫虎臣帥舟師陳焦山下勢張甚乃與阿木登南岸督諸軍力戰
以火矢焚其舟大破宋師宋殿帥張彥與平江安撫劉師勇襲呂
城遣萬戶懷都擊走之克常州降平江嘉興會兵臨安宋降伯顏
命阿塿海等以其幼主母后入覲詔復趨瓜洲與阿木議平淮南
事拜行省左丞相移治臨安從征乃顏師歸奉朝請居京師卒封
順昌郡王諡武敏

張禧東安州人父仁義金末徙家益都太宗下山東仁義方走信
安時燕薊已下獨信安猶爲金守蒙古兵圍信安仁義開門出戰

圍解以功署軍馬總管守信安踰十年度不能支乃舉城附授管軍元帥後攻歸德飛矢入口折其二齒鏃出項率禧年十六從大將阿朮魯南攻徐州歸德復從元帥察罕攻壽春皆有功性峭直為主將所忌誣以罪欲寘之法時王鶚侍世祖於潛邸禧密往依之鶚薦禧與其子宏綱俱入見從南征時方攻鄂州諸軍穴城以入宋樹柵為夾城於內入戰輒不利命以厚賞募敢死士禧與宏綱應募由城東南入將至城下帝憫其父子俱入險地諭止一人進戰禧所報槍中弩矢折取宏綱槍以進破城東南角有逗留不前者十餘人立城下宏綱復奪其槍入轉戰良久禧身中十八矢一鏃貫腹悶絕復甦世祖亟命取血竭飲之既愈復從大將納剌忽與宋兵戰于金口李家洲皆捷世祖即位授新軍千戶從征李璫時宋乘璫叛遣夏貴襲取蘄縣宿州等城禧移兵攻之盡復諸

城至元初擢唐鄧等州總管與宋將呂文煥戰于高頭赤山乘勝復均州改水軍總管令習水戰從攻襄樊宋夏貴率兵援襄陽禧從元帥阿朮戰却之會江水暴溢宋遣范文虎以戰艦千餘艘來援禧率輕舟夜銜枚入其陣揮葦以識水之深淺及還阿朮即命禧率四翼水軍進戰宋兵潰追至淺水奪戰艦七十從攻樊城焚其串樓敗宋將張貴于鹿門山行省集諸將問破襄陽策禧言襄樊夾漢江而城敵人橫鐵鎖置木橛于水中若斷鎖毀橛以絕其援則樊城必下樊下則襄陽可圖伯顏用其策襄樊相繼下命禧為水軍先鋒敗宋孫虎臣于丁家洲尋移屯黃池以遏宋援兵有功加水軍萬戶時朝廷議征日本禧請行與右丞范文虎左丞李庭同率舟師泛海東至平壺島禧即舍舟築壘約束戰艦各相去五十步止泊以避風濤觸擊俄颶風大作它戰艦悉壞禧所部得

完文虎等議班師時島中屯兵數千乏舟禧曰我安忍棄置於此
 悉去舟中所載馬濟其還至京文虎等皆獲罪禧獨免子宏綱
 字憲臣年十八父為主將所誣繫獄宏綱直入獄中併受繫伴狂
 謔笑守者易之既寢遂與其父逸去後從父攻城狗地屢有功襲
 萬戶盜起安吉宏綱率兵往捕未踰旬擒之從參政高興破建德
 溪寨諸賊授河南諸翼征行萬戶從右丞劉深征八百媳婦師次
 八番與叛蠻宋隆濟等力戰而歿追封齊郡公諡武宣

張宏範字仲疇易州定興人柔子也善馬槊間能為詩歌年二十
 授行軍總管從討李壇于濟南柔戒之曰汝圍城勿避險地險則
 汝無怠心兵必致死主者慮其險苟有犯必赴救可因以立功宏
 範營城西壇每出軍侵突獨不向宏範營宏範曰我營險地壇故
 示弱於我必以奇兵來襲謂我勿悟也遂築長壘內伏甲而外為

濠開東門待之夜浚濠益深廣壇不知也明日果擁飛橋來攻未
 及岸軍陷濠中得跨濠上者突入壘門遇伏皆死柔聞之曰真吾
 子也壇既誅宏範亦以例罷兵柄世祖念其有濟南功至元初授
 順天路管民總管俄移守大名歲大水漂沒盧舍宏範輒免民租
 朝廷罪其專擅宏範請入見進曰臣以為朝廷儲小倉不若儲之
 大倉帝曰何說對曰今歲水潦不收倘必責民輸倉庫雖實而民
 死亡殆盡明年租將安出曷若活其民使不至逃亡則歲有恆收
 非陛下大倉庫乎帝謂其知大體勿問典章云至元五年宏範於古宅得玉印
 二色古而形制異宏範不敢私納之官
 會史天澤督諸道兵圍襄陽授宏範益都淄萊等路行軍萬戶廷
 議以益都兵本壇舊卒勇悍難制故命領之成鹿門堡以斷宋餉
 道且絕郢復之援宏範建言曰國家規取襄陽周於圍而緩於攻
 者無非重人命而待其自斃也曩者夏貴乘江漲送衣糧入城我

師坐視無肯禦者且其境南接江陵歸峽商販行旅休卒道出襄陽南者相繼寧有自斃之時乎若城萬山以斷其西立柵灌子灘以絕其東則庶幾速斃之道也天澤用其言移宏範兵戍萬山既城與將佐較射出東門宋師奄至眾欲退宏範曰吾與諸君在此何事敵至將不戰乎即擐甲上馬遣偏將李庭當其前親率二百騎爲長陣令曰聞吾鼓則進宋軍步騎相問突陣宏範軍不動再進再却宏範曰彼氣衰矣鼓之前後奮擊宋師奔潰攻樊城流矢中其肘束創見主帥曰襄在江南樊在江北我陸攻樊則襄出舟師來掾故猝難下若截江道斷其援兵水陸夾攻樊必破矣樊破則襄陽何所恃明日出銳卒先登拔之遂下襄陽丞相伯顏伐宋宏範率左部軍循漢江東畧郢西南取武磯堡轉戰而前諸軍繼進宋師潰長驅至建康時方暑帝遣使諭伯顏緩兵宏範曰聖恩

待士卒誠厚然緩急之宜非可遙度今敵已奪氣正當乘破竹之勢取之豈宜延緩使敵得爲計丞相馳詣闕而論形勢得旨進師次瓜洲宋姜才統勁兵二萬出揚子橋夾水爲三疊陣宏範從元帥阿朮出先以十三騎徑渡衝之陣堅不動宏範佯北一騎躍馬揮刀直趣宏範宏範旋轡迎刺應手斃馬下奮戈急擊才潰走宋張世傑孫虎臣等率水軍于焦山決戰宏範以一軍從旁橫擊至圖山東奪戰船八十艘俘斬無算上其功改亳州萬戶從左丞董文炳由海道會伯顏次臨安近郊取宋主稱臣表來上師還授江東道宣慰使聞宋益王昀世傑等復立衛王于海上聞廣響應帝命宏範爲蒙古漢軍都元帥往往征之陸饋賜錦衣玉帶宏範不受以劍甲爲請帝出武庫劍甲聽其自擇且曰劍汝之副也不用命者以此誅之將行薦李恒爲副至揚州選將校水陸分道而南以

弟宏正為先鋒戒曰選汝驍勇非私汝也軍法重我不敢以私曉
 公宏正所向克捷進攻三江寨寨據隘乘高兵皆持滿以待宏範
 令下馬治朝食若將持久者忽磨軍連攻他寨迴擣三江盡拔之
 至漳州軍其東門命別將城西南乃乘虛擣其北門拔鮑浦寨瀕
 海郡邑皆望風降附宏正執宋丞相文天祥于五坡嶺使之拜不
 屈宏範義之待以賓禮送至京獲宋禮部侍郎鄧光薦命子珪師
 事焉由潮陽發舶入海道至甲子門獲宋斥候將知衛王所在進
 次厓山宋軍結大舶千餘碇海中中艦而外舳四周起樓櫓如城
 橫亘百餘里厓山東西對峙其北水淺舟膠非乘潮不敢進宏範
 由山之東引舟轉南入大洋始得逼宋舟經世大典云宋以烏蛋船千隻蟻
 潛取之船中並皆海民不習戰攻殺靡遺即取烏蛋載草灌油乘風縱火欲焚宋艦宋預以泥塗
 艦懸水筒無數火船至鈎而沃之竟莫能燬李恒謂宏範曰賊船正當海港宜急攻之恐彼乘潮
 遁去不能成功且出騎兵斷汲路燒其宮室世傑有甥在宏範軍中三
 和與畫圖定計

使招之不應大典云宏範以世傑本其父柔之故卒從柔成杞有罪逃宋因訪其甥韓
 姓者招之世傑歷數古忠臣曰吾知降生且富貴但為主死不可移也李

恒自廣州至授以戰艦二使守北面將戰或請先用礮宏範曰礮
 起則舟散吾分追非所利不如戰也乃四分其軍令恒等軍東南
 北三面宏範自將一軍居西南與宋軍相去里許令曰宋舟東艤
 厓山潮退必南遁急攻之勿令去聞吾樂作乃戰先麾北軍乘潮
 出戰不克恒等順潮退樂作宋將以為且宴氣少懈宏範舟師犯
 其前豫構戰樓於舟尾以布幙障四匝之俾將士負盾而伏令曰
 聞金聲起戰飛矢集如蝟伏盾者不動舟將接鳴金撤幙弓弩火
 石交發頃刻并破七舟宋臣陸秀夫先沉妻子抱衛王曰官家事
 急矣遂赴水死從死者十萬餘人嶺海平宏範磨厓山之陽勒石
 紀功而歸大典云時浮屍蔽海有卒見一屍小而皆衣黃衣負印上云
 詔書之寶遂取寶以獻宏範知為昺也急求之已不得矣入朝陽宴內殿
 慰勞甚厚未幾瘴癘疾作病甚沐浴易衣冠扶掖至中庭面闕再

拜退坐命酒作樂與親故言別出所賜劍甲付子珪曰汝父以是立功汝佩服勿忘語竟端坐而卒年四十三延祐六年加封淮陽

王諡獻武子珪見宰輔傳名臣事畧云宏範素傲悟身長七尺修髯如畫初伯頌至建康大會諸將出庫金行賞宏範後至伯頌曰祖宗之初

凡以軍事會集罪加後雖貴近無所貸爾何敢後宏範徐進曰臨陣未嘗後受賞恥用光何為不可伯頌為之俛首簿錄宋內府金帛都事夾谷之奇與焉既而多所遺失將就考驗宏範曰之奇名工行義有素以官爵家格保其無私後果白嘗戒其子曰居官律已廉慎則公明兄宏

畧字仲傑嘗從父鎮杞徙亳權順天萬戶虞集廟堂碑云順天者收保州以柔故升府後改名曰保定從

征四川憲宗以其幼賜錦衣還鎮李瑄反宋夏貴乘虛北奪亳滕

徐宿邳滄濱七州新蔡符離蘄利津四縣宏畧率戰船遏之澗口

貴退保斬更發亳軍攻之宋兵焚城宵遁盡復所陷州縣瑄誅追

問當時與瑄通書者獨宏畧書皆勸以忠義事得釋俾解兵柄猶

衛京師及城大都佐父柔為築城總管城成授淮東道宣慰使尋

移江西饒州盜起犯都昌宏畧謂饒非吾屬然與南康止隔一湖

此寇不滅則吾境必有相扇起者乃使人直擣其巢生縛賊首磔

于市令曰不操兵者皆為平民一無所問頃之以疾歸亳有讒貴

臣子在江南買田宅樂而忘歸者詞連宏畧或曰公未嘗在江南

宜入見自辨宏畧曰辨之則言者獲譴矣吾寧稱疾家居後見上

于龍虎臺請曰臣之子玠長矣願備宿衛世祖賜之酒且曰卿年

未老何遽謝事命為河南參政卒追封蔡國公諡忠毅

李恒字德卿其先於彌氏唐末賜姓李世為西夏國主其祖為夏

主之子守兀納刺城太祖經畧河西城陷不屈死子惟中方七歲

求從父死宗王合撒兒留養之從經畧中原有功授淄川達魯花

赤蓋恒父也恒生有異質王妃撫之猶己子中統三年命為尚書

斷事官恒以讓其兄李瑄反恒從惟中棄家入告變瑄怒繫恒闔

門于獄瑄誅得出世祖嘉其忠累授益都淄萊新軍萬戶從伐宋

圍襄陽率本軍築堡萬山扼城西斷其陸路守將呂文煥等以漁舟浮漢水窺伺軍形恒設伏敗之水路亦絕進攻樊城恒以精兵渡漢自南而先登伯顏大會師至陽羅堡宋夏貴遣其子松來逆戰恒先陷陣額中流矢戰益力卒射殺松已從伯顏東下宋將高世傑復窺漢沔仍遣恒還鄂州從阿里海牙至洞庭與世傑戰擒之下岳州進拔沙市宋制置高達以江陵降留恒鎮之恒禁軍士毋得入城侵掠未幾徙駐常德以扼湖南之衝俄有詔分三道出師以恒爲左副都元帥從都元帥宋都解史作遜都台出江西開府江州擒宋都統制熊飛遂圍隆興轉運使劉槃請降恒察其詐密爲備槃果以銳兵突至恒擊敗之槃始降由撫瑞建昌臨江進攻吉州知州周天驥降遂定虔南廣東經畧徐直諒奉書納所部十四郡前江西制置黃萬石亦以邵武降宋丞相陳宜中及張世傑立益

養蒙集云
論武啟

問曰宋鼎已淪蛟蜃與隣元帥慧掃颶立湖昏崖腥染鏗海沸漂丹趙氏塊肉藁葬其間瘴生毒發天道好還

李德輝字仲實通州潞縣人生五歲父疾革指德輝謂家人曰吾爲吏治獄不任苛刻蒙德者衆天或報之是兒其大吾門乎既就外傳嗜學貧無以自資輒輟業年十六監酒豐州祿食足供母餘則市筆札錄書夜誦不休歎曰志士顧安此邪仕不足以匡君福民隱不足以悅親善身天地大矣人壽幾何惡可無聞同腐草木乃更求明師講習世祖在潛邸用劉秉忠薦使侍皇子講讀世祖受京兆分地擇廷臣能理財賦者俾調軍食立從宜府以德輝爲副使時汪德臣屯重兵數萬於利州扼四川襟喉規進取每苦乏興德輝乃募民入粟綿竹散錢幣給鹽券爲直陸輓興元水漕嘉

陵未期年而軍儲充羨至元初由太原路總管入為右三部尚書

名臣事略云人有訟賊而失其兄子者德輝曰叔殺之也深竟其獄懸賞購之其家果上變告叔竟以是死皇子安西王鎮關中奏以德

輝為輔改安西王相至則視瀕涇營牧故地可得數千頃起廬舍

疏溝澮假牛種田具與貧民屯田其中歲得粟麥芻藁萬計奉命

以王相撫蜀時宋亡惟川蜀久不下宋制置張珪守重慶安撫王

立守合州于是分建東西二川行樞密院合丹澗里吉思領東

院攻合州丞相不花與德輝領西院攻重慶德輝至成都各遣使

請方畧德輝曰宋已亡矣重慶以彈丸地不降何歸政以公輩利

剽掠民不得有其子女懼而不來耳嚮者中使奉璽書來赦公等

不能推心置腹反示以詐使彼叛去堅其必死之心中使不喻詐

計竟以不奉明詔復命非養寇而何况軍政不一行且敗矣未幾

瀘州叛重慶圍亦潰詔以德輝行西院副使事復瀘州再圍重慶

尋拔之紹慶南平夔施思播諸山壁水柵皆下而東川樞府猶故

將也惡相屬願獨軍圍合州德輝乃出合俘繫順慶獄者縱使歸

以書遺張珪曰天子威德遠播宋室既亡三宮皆北苟能早自歸

誠必取將相與夏呂比且汝之為臣不親於宋之子孫合之為州

不大於宋之天下彼之子孫尚舉天下歸我汝猶偃然負阻窮山

而曰吾終於所事不亦惑哉既而合州遣李興張郃等偵事成都

德輝獲之釋不殺復為書縱歸使諭其將王立如諭珪者未幾立

使興等懷蠟書還成都言李公能自來即降德輝以從兵數百人

馳赴東川先是重慶破珪走涪州自經死至是諸將皆曰公昔為

書招珪誠亦傑矣而竟無功今立乃珪牙校也習狙詐不信是特

以計致公延命晷刻耳德輝曰重慶已下合州孤立窮而來歸亦

勢所必然吾豈肯攘諸君垂成之功誠懼諸君憤其抗命快心屠

城吾欲為國活此民耳即單舸濟江薄城下呼立出降德輝命立
 權安撫事知合州川蜀盡平既而東川行院恥無功言立久抗王
 師且嘗指斥憲宗奏請誅立械繫長安獄將殺之會行院都事呂
 或以事至上都白留守賀仁傑為言於帝而安西王亦具立降附
 本末來上且言東川院臣憤德輝受降之故誣奏誅立帝召樞密
 臣責曰汝等視人命若戲邪今名王立來生則已死則汝等從之
 立至仍命為合州安撫使遷或四川行省郎中或字伯充河內人官至侍講學士會西
 南契羅施鬼國既降復叛詔滇楚四川各出兵合討將壓境德輝
 適被命在播馳驛止三道兵勿進而遣使諭鬼國趣降其長阿察
 素熟德輝名曰是活合州李公邪即身至播州泣告謂吾屬微公
 來死且不降今願以百萬人民託公事聞詔許其降改鬼國為順
 元路或譖德輝受鬼國馬千數帝曰是人朕所久知雖一羊不妄

王昱于福州收集潰兵郡縣蒙傑督應世傑遣都統張文虎與吳
 浚合兵十萬期復建昌恒貽之于南豐縣浚走從文天祥於瑞金
 又破之天祥走汀州遣鎮撫孔道道之併克汀州既而天祥復取
 汀州兵出興國連破城邑圍贛州或言天祥祖父墓在吉州若遣
 兵發之勢必下恒曰王師討不服耳豈有發人墳墓之理遂分兵
 援贛自率精銳至興國天祥走追至空坑獲其妻女擒招討使趙
 時賞降其眾二十萬宋史云天祥妻歐陽氏男佛生環生及一女皆見執趙時賞坐肩輿後眾問為誰曰我姓文眾以為天祥也禽之天祥由是得脫奔福州
 有旨令恒與右丞阿刺罕善學又炳合兵追益王眾議所向皆謂宜
 趨福建恒曰不可若諸軍比日入閩彼必東窺粵則梅嶺江西非我
 有矣宜從廣東夾擊眾以為然兵至梅嶺果與宋兵遇敗之乃走
 碯州粵志云碯州屹立海中當南北道乃雷化交錯處帝昇為翔龍縣益王殂世傑等復立衛王昺據廣東
 恒時為江西參政以張宏鈞薦特加副都元帥進取英德清遠遂

入廣州世傑等移屯新會縣之崖山時宏範舟師未至恒按兵不
 動分遣諸將畧定梅循諸州會宏範至自漳州發潮陽港直指崖
 山恒率所部戰船急赴世傑集海艦千餘貫以巨索為柵以自固
 恒先斷其汲路勢日蹙論降不可會潮退水南瀉恒從北順流衝
 擊令諸軍陣于船尾轉船逆行擣其柵索絕世傑猶死戰日午潮
 至水北流宏範復督南軍合擊宋腹背受敵軍潰亂陸秀大抱衛
 王赴海死獲其符璽印章世傑走死海陵港經世大典云世傑乘開闢南壁
 率十六艦奪港門遁恒獨追至
崖山口焚溺之餘尚得海船八
 百餘艘未承宣使翟國秀就降功成入覲拜中書左丞行省荆湖禁掠民為
 奴婢并賑給常德豐辰沅靖五郡之饑者以久留瘴鄉感疾乞解
 軍職命其子散木解襲本軍萬戶後復從鎮南王脫歡征交趾結
 筏渡海奪天長府會盛夏軍中疾作眾議班師蠻兵追襲恒殿後
 且戰且行毒矢貫右膝一卒負而趨至思州毒發卒追封滕國公

受寧有是邪卒年六十三

姚行狀云其年王相府罷十一月始至廣平是夜星如
 垣外德輝歎曰吾死徵也吾嘗誦馬伏波老婦語

壯之言而奇曹武惠為將不殺
 今得活羅鬼馬車衣屍歸何堪蠻獩聞計哭之如私親王立自合州衰經率
 吏民拜哭護喪歸興元至今播州廟祀不絕

冊曰師以戡亂寧恣屠戮心苟好生民自誠服剽掠公行堅
 其竄伏侃侃數言煌煌照燭雖踰千年起人敬肅

元史類編卷之十九終

邪太祖怒命討之會亦納思老國亂其子忽魯速蠻遣使欲歸順時太祖已命皇孫蒙哥帥師抵其境忽魯速蠻之子班都察遂舉族降命掌上方馬畜歲時捐馬乳以進色清而味美號黑馬乳因曰其屬曰哈刺赤哈刺黑也土土哈班都察子也中統初襲父職備宿衛宗王海都將搆亂世祖以國家根本之地詔皇子北平王率諸王兵鎮之至元十四年諸王脫脫木兒昔里吉叛寇抄諸部掠憲宗所御大帳土土哈率兵進討敗之于納蘭不刺邀諸部以還應昌部族只兒瓦台叛脫脫木兒起兵應之途遇土土哈將戰先獲其候騎數十脫脫木兒引去追至禿兀刺河三宿而返尋敗之于幹歡河奪回所掠大帳明年大軍北征詔率欽察驍騎千人從追昔里吉踰金山擒其黨札忽台等來獻又敗寬折哥等裏瘡力戰獲羊馬輜重無算還朝帝慰勞仍賜以奪還所掠大帳諭曰祖宗

武帳非人臣所得御以卿能歸之故以為賜二十年詔以所部哈刺赤屯田畿內詔給霸州文安縣田四百頃益以宋新附軍八百人俾領其事賜水磴一區近郊田二千畝籍河東諸路蒙古軍子弟四千六百人隸其麾下拜樞密副使尋置欽察親軍衛命兼都指揮使叛王海都兵犯金山詔與大將朶兒朶懷共備邊會宗王乃顏反陰遣使來結也不干勝刺哈二部長為土土哈所執盡得其情實勝刺哈設宴來邀二大將朶兒朶懷欲往土土哈謂其意叵測遂止計不得行未幾有旨令勝刺哈入朝將由東道進土土哈言於北安王曰彼分地在東脫有不虞是縱虎入山林也乃命從西道進既而言也不干叛者益眾王欲先聞於朝後發兵土土哈曰兵貴神速若彼果叛我軍出其不意可即圖之否則與約而還即行疾馳七晝夜渡禿兀刺河戰于孛怯嶺大敗之也不干僅

元史卷一百一十一
九十一
以身免時世祖親征乃顏方在軍聞之遣使命收其餘黨沿河而下遇叛王鐵哥軍萬騎擊走之并擒叛王哈兒魯等獻俘行在時成宗以皇孫北撫諸軍詔土土哈從追乃顏黨于哈刺温山誅叛王兀塔海盡降其衆諸王也只里爲叛王火魯火孫所攻來告急復從皇孫移師往援敗諸兀魯灰夜渡貴烈河復擊敗叛王哈丹軍盡得遼左諸部置東路萬戶府世祖多其功以也只里女弟塔倫妻之二十六年從晉王甘麻剌征海都抵杭海嶺敵先據險諸軍被圍土土哈引勁卒陷陣翼王出追騎大至選精銳設伏待之寇不敢逼秋帝自將至北邊召見慰諭之曰昔太祖與臣下同患難者飲班朱河水以紀功今日之事何愧前人卿其勉之還至京大宴復謂曰朔方人來聞海都言杭海之役使彼邊將皆如土土哈者吾屬安所置哉論功行賞帝欲先欽察之士土土哈言慶賞

之典蒙古將吏宜先帝曰爾母事過讓蒙古人誠居汝右力戰豈在汝右邪命籍建康廬饒租戶爲哈刺赤戶益以俘獲千七百戶賜之仍官一子督其賦土土哈奏言哈刺赤軍以萬計足備戰守之用于是率其軍北獵于漢塔海邊寇聞之皆引去二十九年秋畧地金山獲海都之戶三千餘還至和林有詔進取乞里吉思師次欠河水行數日始至其境盡收五部之衆屯兵守之奏功給行樞密院印海都聞取乞里吉思引兵至欠河復敗之擒其將成宗卽位詔以邊境事重免會朝遣使就賜七寶金壺盤盃白氈帳一獨峯駝五諸王附海都者率衆來歸邊民驚擾土土哈身至玉龍罕界饋餉安集之導諸王岳木忽兒等入朝帝解御衣以賜奉命還北邊行至宣德府卒加封延國公諡武毅子牀兀兒初以大

臣子拜左衛親軍都指揮使

闕復世績碑天帝操刀七以事割

繼襲父職領

元史類編 卷二十一
征北諸軍踰金山攻巴隣地巴隣之南有答魯忽河其將帖良臺阻水而軍伐木柵岸自蔽士皆持弓矢蹲而待我軍不能進牀兀兒命吹銅角舉軍大呼聲震林野敵衆不知所爲爭起就馬于是麾師畢渡湧水拍岸木柵漂散因奮師馳擊盡得其人馬廬帳還次阿魯河與海都援將孛伯遇急麾軍渡河蹙之追奔三十餘里孛伯遠遁大德二年北邊諸王篤哇徹徹禿等潛師襲火兒哈禿之地敵兵據高山牀兀兒選勇而善步者持挺刃四上奮擊盡覆其軍入朝授僉樞密院事兼欽察親軍都指揮使復還邊四年秋叛王禿麥幹魯思等犯邊牀兀兒迎敵于濶客之地及其未陣直前搏之追踰金山乃還海都兵越金山而南止于鐵堅古山因高以自保牀兀兒急引兵敗之復與篤哇相持于兀兒禿之地以精兵馳其陣殺傷幾盡遣御史大夫禿只等集諸王軍將問戰勝功

狀以牀兀兒居最命尚雅忽禿楚王公主察吉兒及使者以功簿奏帝復出御衣遣使臨賜之七年秋入朝帝親諭曰卿鎮北邊累建大功雖以黃金飾汝身猶不足盡朕意賜衣帽金珠物甚厚拜樞密院副使諸王篤哇子欵徹海都子察八兒等相聚謀曰前與土土哈戰既弗克勝今與其子牀兀兒戰又無功不若遣使請命通好使吾兵民傷殘疲憊者得以休息使至帝許之于是皆罷兵入朝特置驛以通往來成宗崩武宗時在渾麻出之海上牀兀兒請急歸定大業武宗納其言即日南還及即位加平章政事進封容國公至大二年入朝加封句容郡王
武宗紀作至大二年正月事仁宗紀延祐三年六月復載此條似屬重出
曰世祖征大理時所御武帳及所服珠衣今以賜卿其勿辭翌日又出世祖所乘安輿曰以卿有足疾更賜此牀兀兒泣辭曰貪寵過當臣實不敢帝顧左右曰他人不知辭此別命有司置馬轎俾

得乘至殿門仁宗延祐初敗叛王也先不花等軍于亦忒海迷失之地碑云方接戰有敵將一人持戟入陣刺之狀元兒擗其戟揮大斧碎其首乘勢奮擊大敗之已又敗其所遣將忽都帖木

兒于赤麥干之地追出境至鐵門關遇其大軍于札亦兒之地又

敗之帝憫其老召入商議中書省事大理國進象牙金飾轎即賜

乘之待以宗室親王之禮常曰老臣受朝廷之賜厚矣吾子孫當

以死報國英宗至治二年卒天歷二年加封揚王子燕帖木兒位

宰輔別有傳

洪福源其先內郡人唐遣才子八人往教高麗洪其一也子孫世

貴于三韓名所居曰唐城父大宣以都領鎮麟州歲丙子金源契

丹九萬餘眾竄入高麗紀事本末作契丹人六哥領眾九萬餘據江東城太祖命哈真札刺追討

攻下未附州縣進至王京招其主王瞰瞰遣其弟佺請降置京府

州縣達魯花赤七十二人監其國遂班師壬辰瞰復叛殺所置官

吏悉驅國人入據江華島福源招集北界四十餘城遺民以待仍

遣撒禮塔將兵來討福源盡率所部合攻進至王京南攻處仁城

撒禮塔中流矢卒軍還留福源屯王京癸巳冬高麗悉眾來攻西

京屠其民劫大宣東去福源盡以所招北界之眾來歸處於遼陽

帝嘉其忠授管領歸附高麗軍民長官令招討本國之未附者乙

未帝命唐古與福源進討攻拔龍崗咸從二縣鳳海洞三州山城

及慈州又拔金山歸信昌朔諸州乙巳定宗命阿母罕將兵與福

源共拔威州平鹵城癸丑憲宗命從諸王也古一作耶虎攻禾山東州

春州三角山楊根天龍等城拔之甲寅憲宗紀作乙卯年事與札刺台合兵攻

光州安城忠州元鳳珍原甲向玉泉等城又拔之會高麗族子王

綽入質欲陰有其國譖福源于帝遂見殺後贈瀋陽侯諡忠憲

子茶邱本名俊哥茶邱其小字也幼從札刺台軍以驍勇著世祖嘗以小字呼之中統二年茶邱訟闕雪父冤世祖閱之俾襲父職管領歸附高麗軍民總管至元六年高麗權臣林衍廢國主王植以叛從國王頭輦哥討平之遷江華島所有臣民復歸王京送植就國命茶邱率兵往鳳州等處立屯田總管府會林衍死衍黨裴仲孫復立植親屬承化侯爲王經世大典云以三別抄軍叛竄入珍島茶邱偕經畧使忻都進討破其軍殺承化侯其黨金通精率餘衆走耽羅十年詔茶丘與忻都率兵渡海拔耽羅獲通精殺之高麗平授征東副元帥與都元帥忽敦等經世大典紀事本末俱作忻都領舟師二萬渡海征日本拔對馬一岐宜蠻諸島掠其境而還十八年復命將舟師四萬由高麗金州合浦再征日本會右丞阿刺罕范文虎遇颶風舟壞棄師歸明年命茶邱于平瀨黑堀兒監造戰船七百艘以圖後舉二十三年始罷

兵乃顏叛車駕親征命率高麗女真軍扈從猝遇敵騎萬餘時茶邱兵寡衆懼茶邱夜令軍中多裂裳帛爲旗幟斷馬尾爲旄掩映林木間張設疑兵乃顏驚以爲官軍驟至遂降凱旋授遼陽行省右丞以疾辭叛王合丹等竄入高麗侵撓其國西京距遼陽二千里皆騷動特起茶邱鎮之未幾卒于遼左君祥小字雙叔福源第五子年十四隨兄茶邱見世祖于上京帝命劉秉忠相之秉忠曰是兒目視不凡後必以功名顯至元三年籍高麗民三百戶爲兵令君祥統之從伯顏等軍築萬壽山復從開通州運河帝親諭曰爾守志忠勤朕所知也帝嘗坐便殿閱江南海東輿圖欲召知者詢其險易伯顏以君祥應奏對詳明帝悅顧謂伯顏曰是兒遠大器也從大軍戍河南掠淮西皆有功伯顏伐宋旣渡江君祥時奉使至軍中往來奏事傳旨師次鎮江牒報有洪模者爲宋都督

府將伯顏謂君祥曰汝同姓可往招致也模欣然出見君祥厚遇之宋降歷遷同僉樞密院事乃顏叛從世祖親征每駐蹕君祥輒以兵車外環為營衛布置嚴密帝嘉之凱還類次車駕起居為東征錄二十八年茶邱卒帝命代兄職議者欲自東南海口辛橋開河合灤河運糧至上都與中書右丞阿里相其利害還極言不便罷之成宗即位詔裁久任官知院奏君祥在樞密十六年為最久帝曰君祥始終一心可勿遷也大德三年奉使江浙問民疾苦使還退居昌平之皇華山絕口不論時事九年起遼陽行省左丞卒于位

用曰高麗初闕叛服不常福源父子戮力戎行父死非罪嗣

子克昌竟平其國奄有海疆功成論定讒口何傷

唆都札刺兒氏驍勇善戰入宿衛從征花馬國有功還言曰郡縣

惡少年多從間道鬻馬宋境乞免其罪籍為兵世祖從其請得兵三千人命隸峻都為千戶守蔡州阿木等圍襄陽命峻都出游兵奪宋金剛臺寨笮基窩青澗寨大洪山歸州洞諸隘攻樊城先登拔之遷郢復招討使攻下平江嘉興帥舟師會伯顏于臨安宋平伯顏入朝留參政董文炳經畧浙閩文炳請以峻都為副時衛葵諸州復起兵應宋二王于福州文炳謂曰嚴州不守臨安必危公往鎮之至嚴方十日衢婺徽連兵來攻峻都力戰三月復取婺州敗宋將陳路鈐于梅嶺下攻拔衢州宋丞相劉夢炎降宋史新編云校禮部尚書居官連下處州建寧松溪諸郡邑累擢福建道宣慰使行征南元帥府事時宋廣王據福州其將張世傑圍泉州興化守臣陳瓚舉兵應之文天祥建都督府于南劍州以張清行府事謀復建寧閩中郡縣往往復從宋峻都即馳赴建寧遇宋兵于崇安令其子而

家奴分兵夾擊宋師敗走天祥清等將合兵襲建寧唆都夜設伏轉戰至南劍斬清奪其城連下福州拔興化軍獲瓚支解之世傑聞興化破遂解泉州圍去唆都引兵攻漳州知府何清降進攻潮州知府馬發城守堅唆都塞塹填濠造雲梯鵝車日夜急攻相拒五十日而破發死之唆都屠其城既而天祥軍潰江西廣王世傑死海中唆都還軍福建進左丞行省事于福州入見帝以江南既定將有事海外命改行省泉州招諭南粵諸國初朝廷以占城既附遣唆都統其國者撫治之王十九年命率戰船千艘出廣州浮海伐占城時占城兵號二十萬唆都擊敗于大浪湖其國主遁入山谷且遣人求歸附以款師唆都覺其詐復進兵轉戰至木城下隘阻不得入賊兵旁截歸路軍殊死戰得出乘勝伐烏里越里諸小獐皆下得穀十五萬以給軍二十一年鎮南王脫歡征交趾詔唆都率師來會事紀

本末云交趾通謀占城帝令軍行假道于其國且徵其糧餉以給軍安南王陳日烜言其國至占城非便分兵拒守境上

敗其兵于清化府奪義安

關脫歡命屯天長海口以就食與大營相距二百里俄得旨班師脫歡引去唆都不知也交人告之弗信及至大營已空交兵避之于乾滿江力戰死追諡襄愍 子百家奴初從阿朮攻襄陽築新城數立功後隸伯顏麾下從攻鄂州深入身被數創攻沙洋立雲梯於東角樓登城力戰克之伯顏上其功世祖大悅曰此人朕心識其名行大用也從圍漢陽轉戰至黃州圍江州畧地宣州皆有功領新附軍守鎮江未幾復從平章博魯歡取泰壽二州中創遂罷攻後數日與萬戶葉了虔將兵攻泰州新城力疾先登破之復被兩創累功授管軍總管鎮高郵白馬湖頃之狗地福建定衢婺信等州城邑復領諸軍航海追逐張世傑于惠州甲子門廣州諸郡以次削平改海外諸番宣慰使仍領本翼軍守福建已從父征

交趾父戰歿後與脫歡再引兵薄交趾境水陸轉戰輒有功歷除建康鎮江路總管金瘡發卒于家

來阿八赤寧夏人父木速忽里歸太祖命掌膳事憲宗大舉伐宋命諸將議進取之計木速忽里曰川蜀之地三分有其二所未附者巴江巴下數十州耳地削勢弱兵糧皆仰給東南故死守以拒我師蜀地巖險重慶合州又其屏藩皆新造之邑依險爲固今頓兵堅城下未見其利曷若城二城之間選銳卒命宿將守之與成都舊兵相犄角以牽制其援師然後我師乘新集之銳用降人爲鄉導水陸東下破忠涪萬夔諸小郡俟冬水涸瞿塘三峽不日可下出荆楚與鄂州諸軍合勢則東南之事一舉可定其上流重慶合州孤危無援不降卽走矣諸將以其言爲迂卒不用于是博選宿衛中材力可任用者以阿八赤奉命往監元帥紐璘軍駐重慶

下流之銅羅峽夾江據崖爲壘宋都統制甘順自夔州泝流西上乘舟來攻阿八赤預積薪于二壘明火鼓譟順流而進宋軍力不能支退保西岸黎明復至阿八赤身率精兵緣崖而下戰艦繼進宋軍敗走世祖卽位入見問以川蜀之事歷陳始末且誦其父前言世祖撫掌曰當時若從此策東南其足平乎朕在鄂渚日望上流之聲勢耳至元七年南征襄樊發河南北器械糧儲悉聚淮西之義陽命督運二日而畢授益都等路宣慰使都元帥發兵萬人開運河往來督視寒暑不輟河成遷膠萊海道漕運使會皇子鎮南王脫歡復征交趾授湖廣行省右丞二十四年九月領中衛親軍千人導王至思明州時水軍萬戶張玉湖廣參政樊楫亦引兵由海道同至萬劫江交兵阻險拒守命侍衛軍百戶昔都兒拔其一字城及戰于女兒關斬馘萬計再戰于塔兒山於是大軍深入

至都城其主陳日烜空城遁阿八赤曰賊棄巢穴而匿山海者意
待吾敝而乘之也將士多北人春夏之交瘴癘將作賊弗就擒饋
餉且盡恐不能持久矣今出兵分定其地招降納附勿縱士卒侵
掠急捕日烜上策也時日烜復遣使約降欲緩師諸將信其說且
修城以居而待其至久之軍乏食日烜且擁眾據竹洞安邦海口
阿八赤率兵往攻屢與賊遇晝夜迎戰賊稍却會將士多被疫不
能進諸蠻乘之復叛所得關隘盡失乃議班師日烜復集散兵守
東關退脫歡歸路諸軍且戰且走交人乘高險射毒矢被傷過半
行次陷泥關阿八赤中飛矢三首項股皆腫遂卒于道楫與玉仍
奉王命將舟師還爲賊邀遮白藤江潮下舟膠賊大至力戰被創
投水中爲賊鈎執毒殺之 楫寇州人後諡忠定 玉保定人
昔都兒欽察人父禿孫隸蒙古軍籍以功授百戶昔都兒代父職

從大軍南征攻取襄陽唐鄧申裕鈞許等州累功授管軍總把仍
將其父軍從諸王伯木兒追擊折兒四台岳不思兒等於黑城哈
刺火林之地平之改侍衛軍百戶時亡宋猶有未下城邑昔都兒
言於行省願自舉兵往取諸城聞風歛附至元二十四年進漢洞
右江萬戶府達魯花赤領洞軍從鎮南王征交趾入其境駐兵萬
劫江左丞阿八赤命進兵拔其一字城射交人奪其戰艦進逼僞
興道王居與交人戰于塔兒山奮戈擊之右臂中毒矢流血盈掬
灑血奮戰射死交人二十餘仍督諸軍乘勝繼進大敗之入其都
城戰于韓村堡擒其將黃澤夜二鼓交人突至謀劫營官軍堅壁
以待敵失計詰旦鳴鼓出營交兵退追殺甚衆還營立木柵增邏
卒交兵不敢犯及鎮南王引兵還以昔都兒爲前鋒行次陷泥關
戰數千合敵稍却復還迎鎮南王于女兒關交兵截其要道時諸

軍乏食且疲於戰將佐相顧失色昔都兒率勇士直前衝擊得全師而還官止礮手軍匠萬戶府達魯花赤

冊曰南交險遠且饒炎瘴水土未諳山川迷嚮師不宿飽車艱轉軼徒誚輿尸莫來稽顙遐想捐之長策非妄

史弼字君佐蠡州博野人曾祖彬有膽勇木華黎兵南下蠡守閉城自衛彬謂諸子曰吾所恃者郡守也今棄民自保吾寧甘束手

以死乃率鄉人數百家詣降木華黎書帛為符遣還既而州破獨彬與同降者得免

王暉行狀云彬生忠忠生伯祥伯祥生弼

石為獅重四百斤弼舉之置數步外

行狀云年十七耕牧田間牛憩桑陰下父往歸遙眺有元虬穴其口父大駭趨呼之寤間

相耶律鑄從至北京近侍火里台見所挽弓異之以名聞世祖召

為曰無所覺自是手力若有神助

見試之射連發中的令給事左右

行狀云嘗奉旨數軍費于邊營岳廟于維由是廉幹之稱聞于朝

授管軍

總管命從劉整伐宋攻襄樊嘗出挑戰手橫刀大呼曰我史奉御

也宋兵却退至元中諸將十二道圍樊城弼攻東北隅凡十四晝

夜破之以功遷副萬戶從伯顏南征攻沙洋堡飛矢中臂城拔凝

血盈袖軍至陽羅堡伯顏誓眾曰先登南岸者為上功弼率健卒

直前宋兵逆戰奮呼擊走之伯顏登南岸論弼功第一鄂州平移

軍而東駐瓜州伯顏授弼三千人使立木堡據揚子橋宋將姜才

以萬軍乘夜來攻人挾束薪填塹弼戒軍中無譁俟其至發礮石

擊之才乃退未幾才復以兵夜至弼三戰三勝天明見弼兵少急

圍之騎士挾火槍迎刺弼揮刀禦之左右皆仆手刃數十人乃出

圍追者尚數百騎弼殿後敵不敢近會援兵至才奔泰州揚州守

將朱煥降使麥朮受其降于南門外弼止從數騎由保城入揚州

出南門與之會以示不疑制授揚州路總管府達魯花赤兼萬戶

俄遷黃州宣慰使尋調浙西改淮東

續文獻通考云建寧米價踴貴弼發米十萬石以平價售於民省官欲增其直弼曰

吾不可失信寧割吾俸以足之省官不能奪

弼凡三官揚州人刻石頌之號三至碑二十年建

寧賊黃華既降復叛命弼引兵急擊之華走死二十六年冬八朝

時瓜哇黥信使者孟琪面帝怒欲大舉謂弼曰諸臣為吾腹心者

少欲以瓜哇事付汝對曰陛下命臣臣何敢自愛二十九年拜福

建行省平章征瓜哇以亦黑迷失高與為副

經世大典云會福建江西湖廣三行省兵一萬海舟千艘實一

年十二月發泉州風急濤湧舟掀斨士卒皆數日不能食過七洲

洋萬里石塘歷交趾占城界明年正月至東董西董山牛犄嶼入

混沌大洋檄欖嶼假里馬答勾闌等山駐兵伐木造小舟以入

云三月會軍八節瀾瀾上接杜馬班王府下通瀟奔大海乃咽喉必爭之地

時瓜哇與隣國葛郎構怨瓜哇主哈只

葛達那加刺已為葛郎主哈只葛當所殺其婿土罕必闍耶攻葛

郎主不勝退保麻喏巴歇聞弼等至遣使以其國山川戶口及葛

郎國地圖迎降求救弼與諸將進破葛郎兵其主走歸國尚與言

瓜哇雖降倘中變與葛郎合則孤軍懸絕可虞弼遂分兵三道攻

葛郎至答哈城葛郎擁兵十餘萬迎敵自旦至午葛郎兵敗入城

拒守眾圍之哈只葛當出降取其妻子官屬百餘人以歸土罕必

闍耶乞歸易降表且貢所藏珍寶入朝許之遣萬戶捏只不丁甘

州不花以兵二百人護還國高興深言其非計中道果殺二使以

叛乘軍還夾路攘奪弼自斷後且戰且行行三百里得登舟行六

十八日夜達泉州士卒死者三千餘人有司數其俘獲金寶香布

等直五十餘萬又以沒理國所上金字表及金銀犀象等物進

瓜哇國傳

朝廷以其亡失多杖十七沒家貲三之一成宗元貞元年起

同知樞密院事諸大臣奏弼等以五千人渡海二十五萬里八近

代未嘗至之國俘其王及諭降旁近小國宜加矜憐詔還其所籍

拜江西右丞遷平章政事加封鄂國公卒于家年八十六

老人書宗晉八亦善大字

書史會要云號紫微

高興字功起蔡州人力挽二石弓嘗步獵南陽山中遇虎跳踉大吼眾驚什興神色自若矢一發立斃之至正十一年冬挾八騎詣黃州謁宋制置使陳奕奕使隸麾下且奇其貌以甥女妻焉伯顏伐宋至黃州興從奕出降授千戶從渡江破瑞昌之烏石堡張家砦陷南陵伯顏以功聞世祖命興專將一軍為先鋒由間道奪獨松關進至武康宋降伯顏北還留興以兵取衢婺二州追宋嗣秀王與樺入閩擒之下興化遷管軍萬戶還鎮婺州充衢婺招討使復從都元帥忙古歹平福建漳州破敏陽寨屠福成寨詔興立行都元帥府于建寧以鎮之討降叛人黃華高日新高從周等召入朝侍宴悉獻江南所得珍寶世祖曰卿何不少留對曰臣素貧賤

今幸富貴皆陛下所賜何敢隱帝喜曰直臣也遷浙東道宣慰使漳州盜陳弔眼有眾數萬據高安寨官軍討之久不下詔以興為福建征蠻副元帥與都元帥完者都合討直抵其壁賊乘高瞰下矢石如雨興命人挾束薪蔽身進至山半棄薪退如是者六日誘其矢石盡乃燃薪焚其柵時盜蔓延五十餘寨扼塞白岡興攻破其十五寨弔眼走保干壁嶺興上至山半誘與語接其手擊下擒斬之漳州悉平元明善神道碑云詔改浙西道黃華復叛急攻建寧興與戰屢敗走江山洞追至赤巖寨華赴火死碑云二十一年召赴闕救副雲的斤征緬興辭曰臣不敢愛死母老子幼無他兼侍願盡母年惟陛下所使上允其誠二十三年遷江淮參政平婺州賊施再十丁母憂廬汝寧墓側二十九年詔為福建行省平章與史弼亦黑迷失同征瓜哇明年春浮海抵其境亦黑迷失將水軍興將步軍會八節澗瓜哇主婿土罕必閣耶降進攻葛郎國降其主哈只葛當

興師千人深入俘葛郎國子還至答哈城弼更遣使護土罕必闌
 耶歸國易降表與深咎其非計中道果殺使合衆來攻興力戰却
 之遂誅葛郎父子及歸詔治其事弼與亦黑迷失皆獲罪興獨以
 不與議免成宗即位復拜福建行省平章汀州總管同知阿里挾
 怨告興不法召入對盡得其誣狀阿里伏誅累改江浙河南行省
 武宗立召見拜左丞相商議河南省事仁宗皇慶二年卒追封梁

國公諡武宣

一統志云加封南陽王

亦黑迷失畏吾兒人至元二年入備宿衛九年奉世祖命使海外
 八羅孛國十一年偕其國使珍寶奉表來朝次年再往與其國師
 以名藥來獻十八年拜荆湖占城等處行省參政招諭占城二十
 一年召還復命使海外僧迦刺國觀佛鉢舍利賜玉帶衣服鞍轡
 自海上還以參政管領鎮南王府事與平章阿里海牙右丞唆都

征占城戰失利唆都死焉亦黑迷失請王屯兵大浪湖觀釁而後
 動竟得全軍歸二十四年使馬八兒國浮海阻風行一年乃至得
 良醫善藥遂與其陪臣來貢方物又出私錢購紫檀木殿材獻之
 後侍帝浴室中問曰汝踰海者凡幾對曰臣四踰海矣帝憫其勞
 又賜玉帶改授江淮左丞行泉府太卿二十九年召入朝盡獻其
 所有珍異之物時方議征瓜哇立福建行省詔亦黑迷失與史弼
 高興並爲平章以海道事付之仍諭曰汝等至瓜哇先遣使來報
 汝等留後其他諸小國當自臣服可多方招徠之彼若納款皆汝
 等之力也軍次占城先遣郝成劉淵諭降南巫里速木都刺木魯
 不都八刺刺諸小國明年攻葛郎國降其主哈只葛當又遣鄭珪
 招諭木由來諸國皆遣子弟來見會瓜哇主婿土罕必闌耶既降
 遣歸復叛事詳史弼傳諸將議班師亦黑迷失欲如前旨先遣使入奏弼

與興不從遽引兵還以所俘諸小國降人入見帝怒其縱寇沒家費三之一未幾復給還以老家居仁宗念其屢使絕域加封吳國公

冊曰三將桓桓窮兵極遠提師五千百城席卷瓜哇戎荒卒難革而謀不萬全功虧一閻

劉國傑字國寶女真人本烏古倫氏後入中州改劉姓少從軍漣海以材武為隊長至元六年籍漣海兵取襄陽授益都新軍千戶從張宏範戍萬山堡畧荆南抵歸峽轉戰數千里從攻樊城被傷血戰世祖聞其勇遷管軍總管從伯顏南征謀取黃家灣堡國傑先登拔之宋將張世傑盛兵焦山下國傑與董文炳左右夾擊焚其船宋軍大潰追奪黃鵠白鷁船數百艘帝壯之號劉二拔都魯宋亡入朝以漢軍都元帥將衛軍戍北方諸王脫脫木兒寇和林

國傑度其眾悉出營必虛選輕騎襲之殲其眾脫脫木兒屢戰不利又殘暴失眾心眾殺之來降帝怒征東元帥忻都洪茶邱無功阿刺罕范文虎又喪師將盡罷大小將校召國傑為征東行省左丞既至帝語之故國傑曰罪在主帥耳倘蒙聖慈復諸將職彼必人人思奮以雪前耻帝命盡復其官屬國傑再征日本會淮西宣慰使昂吉兒上言民勞乞寢兵役始罷二十三年朝廷以湖廣多盜授國傑為本省左丞既至羣盜以次降諸將請曰此輩久亂急則降降而有釁將復反不如坑之國傑持不可乃相要地為三屯在衡曰清化在永曰烏符在武岡曰白倉每屯分眾五百人守之且墾廢田闢荆榛使賊不得為窟穴降者雜耕其中後皆為良民會討廣西諸盜詔國傑趨赴時肇慶懷集諸賊保險自固國傑鑿山入由賀州移軍道州掩殺幾盡江西盜起龍泉下令往擊諸將

曰此他省盜也國傑曰縱盜滋蔓蔓將難圖豈可作秦越視邪乃選輕兵掩旗鼓去纓飾一日夜趨賊境賊衆逆戰見軍容不整曰此鄉丁也易之國傑以數十騎陷陣衆從之賊大敗日暮忽收兵去堡中民望見莫知爲誰明日又忽至召堡民謂曰吾劉二拔都也民驚以爲神二十八年遷行樞密院副使還軍武昌時上思州黃勝許恃險遠與交趾表裏寇邊詔國傑往討身率士卒奮戰賊走象山徐伐山通道且戰且進拔其寨勝許走匿交趾擒其妻子斬之師還盡取賊巢地爲屯田募度遠諸獯人耕作爲兩江蔽障蠻人莫敢犯帝謂省臣曰湖廣重地惟劉國傑堪鎮此命無遷他官成宗卽位復置行樞密院于衡州仍除副使先是黔中諸蠻巴洞何世雄犯澧州泊崖洞田萬頃楠木洞孟再師犯辰州朝廷嘗討降之升泊崖爲施溶州以萬頃知州事至是復叛國傑馳至辰

州進攻施溶部將田榮祖請曰施溶萬頃之腹心石農坎三羊峯其左右臂也宜先斷其臂國傑曰善麾諸軍攻石農坎賊棄寨遁擒萬頃斬之復窮捕其黨攀崖緣木進至千餘里元貞元年卽軍中加湖廣平章辰澧地接溪峒宋時嘗選民立屯在澧者曰隘丁在辰者曰寨兵宋亡皆廢國傑悉復其制繼又經畫周湖廣四境東盡交廣西亘黔中凡盜所出沒地南北三千里置戍三十有八列屯守之由是諸蠻不敢復寇大德五年王師征八百媳婦土官宋隆濟及羅鬼女子蛇節反陷貴州詔國傑將諸翼兵合四川雲南思播兵討之賊勢勁且多健馬國傑令人持一盾布釘其上俟陣合卽棄盾佯走賊乘之馬奮不能止遇盾皆仆國傑鼓之賊大敗追至墨特川擒斬蛇節宋隆濟等西南夔悉平詔領將士八見張宴享之聽歸益都省墓八年還鎮國傑久行邊患瘴至是病篤

僚屬入問疾國傑曰交賊不道若病幸小愈得滅此蠻則死且無憾卒年七十二追封齊國公諡武宣子脫歡襲湖廣平章尚憲宗孫女

賽典赤瞻思丁一名烏馬兒回鶻人別俺伯爾之裔其曰賽典赤猶言貴族也太祖西征瞻思丁率千騎以文豹白鶻迎降命入宿衛從征伐以賽典赤呼之而不名憲宗命同塔刺渾行六部事遷燕京路總管帝伐蜀命主饋餉供億未嘗闕乏世祖至元初出爲四川平章宋將管萬壽擁兵守嘉定兩軍對壘一以誠意相待將入覲萬壽請置酒爲好左右皆難之瞻思丁竟往不疑將進酒左右復言未可飲笑曰若何見之小邪管將軍能毒我其能盡毒我朝之人乎萬壽益嘆服有旨大軍見圍襄陽各道宜進兵爲牽制計于是瞻思丁率水陸兵至嘉定順流縱筏斷其浮橋尋命行省

興元專給糧餉十一年召還帝謂曰雲南朕嘗親歷比因委任失宜致遠人不服欲選謹厚者往治無如卿者拜命退卽訪求知雲南地理者畫其山川城郭驛舍軍屯險易遠近爲圖以進帝大悅遂拜平章政事行省雲南賜金寶無算時宗王脫忽魯方鎮雲南惑於左右言謂彼至必奪王權宜具甲兵爲備瞻思丁聞之先遣其子納速刺丁至王所請曰天子以雲南守者非人致諸國背叛故命臣來安集今事未敢專願王遣一人來共議王聞遽叱其下曰幾爲汝輩所誤明日遣親臣至瞻思丁問以何禮見對曰吾等與公子偕來視猶兄弟請用卑幼禮見皆以名馬爲贄拜跪甚恭觀者大駭遂設宴陳所賜金寶飲器酒罷盡以與之還報王大喜由是開郡縣設長貳政令一聽其所爲雲南俗無禮義男女每自配偶親死則火之不爲喪祭無秬稻桑麻子弟不知詩書乃示以

拜跪之節婚姻行媒妁死者為棺斂奠祭教民播種修陂池以備水旱創建孔子廟明倫堂購經史授學田由是文風漸興俗以貶代錢時初行鈔法民不便為言於朝許仍其俗又患山路險遠盜賊出沒為行者病相地置鎮鎮設土司吏一人百夫長一人往來者或被劫則罪之有土吏數輩至京訴其專僭狀帝怒命械送回籍聽治既至脫其械且諭之曰若曹不知上以便宜命我故訴我專僭我今不汝罪且授汝官可竭忠自贖眾叩頭謝曰誓以死報交趾叛服不常湖廣省屢征失利贍思丁遣人持書願約為兄弟交趾王大喜親至雲南乞永為藩臣蘿槃甸叛往征之有憂色或問故曰吾非憂出征也憂汝曹劫掠平民使不聊生及民叛則又從而征之耳師次蘿槃城三日不降諸將請攻之贍思丁不可遣使以理論之其主曰謹奉命越三日又不降將卒有乘城進攻者

贍思丁怒名責曰天子命我撫雲南未嘗命以殺戮也無主將命而擅攻於軍法當誅其主聞之曰平章寬仁如此吾拒命不祥乃舉國出降由是西南諸蠻翕然欵附滇志云廣南儂土貴左江李維屏右江岑從威其籍八十餘州戶四十餘萬來聽命蠻長每謁見為具酒食製衣冠襪履易其卉服眾皆感悅居雲南六年卒年六十九葬鄯闡北門交趾王遣使哀經為文致祭滇人立廟祀之成宗大德元年追封咸陽王諡忠惠長子納速刺丁累官雲南路宣慰使都元帥至元十六年分帥大理以軍抵金齒蒲驃曲臘緬國招徠蠻寨籍戶十二萬有奇定租賦置郵傳立衛兵歸以馴象十二入貢經世大典云至元十四年十月納速刺丁由雲南率蒙古驍騎巨木禿磨欲等若上官曲臘清折民四千孟摩愛呂民一千磨奈蒙匡黑各八刺民二萬蒙古甸甫祿保民一萬木都彈禿民二百以天熱還師會其父沒世祖憂之仍以納速刺丁為雲南左丞建言三事一謂雲南省規措所造金箔貿易病民宜罷一謂雲南宣慰司已革而元帥府尚存今

元史卷之二十一
行省既兼領軍民則帥府在所當罷一謂雲南官員惟達官子弟當入質餘並宜罷又奏滅合刺章冗官弛道路禁通民往來禁負販之徒母令從征聽民伐木取材資貿易戒使臣勿擾民居悉報可二十八年調陝西平章以疾卒追封延安王 次子忽辛初以世臣子備宿衛世祖知其能累授同知河南宣慰司事河南素多盜官軍收捕失利忽辛遣土豪持檄招諭有來歸者賜之冠巾曰汝昔爲非今自歸卽良民矣俾侍左右無間已放還令遍諭其黨數日後招集其爲首者十輩至身長各七尺餘羅拜庭下狀頗異觀者悉驚怖忽辛命吏籍其姓名爲民俾隨侍出入夜則令臥戶外時呼與飲食各喜過望羣盜聞之盡歎服成宗大德元年復遷雲南右丞豪民避繇役往往投王府宿衛家有司不勝供給忽辛按元額所無者悉籍爲民去宿衛三分之一馬龍州土司謀叛陰

與外賊通持所授宣勅納賊以示信事覺宗王將不問忽辛反覆研鞫得反狀竟斬之廣南沙奴素强悍宋時嘗賜以金印至今梗化忽辛遣使誘致待以禮留數月不遣曰汝欲還可納印來不得已賫印至因置酒宴勞令賫印入朝帝大悅緬國負固不臣復遣諭曰我老賽典赤平章子也惟先訓是遵緬主聞之遂與使偕來獻白象一旦曰此象古來未有今聖德所致敢効方物既入帝賜緬主以世子號烏白蠻應輸租賦歲發軍徵索忽辛以榜諭之不遣一卒而額賦完武宗至大元年遷江西平章以母老謝歸養卒封雍國公諡忠簡

冊曰創興禮教用革蠻方仁武不殺聞風歎降昔之負固今之馴良令子象賢舊德是章褒封奕世俾民不忘

愛魯唐兀人父昔里鈐部昔里氏鈐部一作紺布亦云甘上音相近也太祖時西夏既臣服命

鈐部招諭沙州將偽降佯具牛酒犒師而陰伏兵以待首帥至
伏發馬躡鈐部以所乘馬與之易使奔而自乘所躡馬殿後太祖
問之對曰小臣陣死不足重輕首將乃陛下器使宿將不可失也
太祖嘉其忠定宗即位授大名路達魯花赤愛魯襲父職世祖至
元五年從征雲南金齒諸部蠻兵萬人絕縹甸道擊破之斬首千
餘級入定其租賦討平火不麻等二十四砦得馴象七以還改中
慶路達魯花赤兼管爨楚軍平章瞻思丁行省雲南令愛魯疆理
永昌增田數倍閱中慶版籍得隱戶萬餘以四千戶卽其地屯田
疆理有方詔開烏蒙道帥師至玉連等州蓋下所過城砦水陸皆
置驛傳而歸遷廣南西道宣撫使十七年復立雲南行省以愛魯
爲參政時烏蒙羅佐山白水江蠻殺萬戶阿忽以叛引兵討平之
召詣闕進左丞芒部也可不薛復叛詔與四川都元帥也速答兒

湖南行省脫里察會師進討禽送京師仁普諸渠長皆降得四千
戶諸王相答吾兒帥諸將征緬愛魯供餽餉無乏絕烏蒙阿謀殺
宣撫使叛右丞拜答兒以愛魯習知山川道里令諸軍悉聽指授
分道進擊生擒阿謀以歸鎮南王征交趾詔愛魯將兵六千人以
從自羅羅至其境時交兵四萬守木元門愛魯攻破之擒其將在
道三月大小一十八戰始至其王城與諸軍會尋感瘴癘卒諡毅
敏

信苴曰


滇志云信苴官名姓段氏本名實後譌爲日

世爲大理國主歲癸丑大元帥兀良哈台

平大理獲其主段興智與其族弟段福獻於朝詔赦之使歸國內
辰入覲獻西南彝地圖請悉平諸郡并條奏治民立賦法憲宗大
喜賜興智名摩訶羅嗟福名信苴福命仍主烏白蠻爨楚等部以
福領其軍興智遂委國任其弟實而自與福率軍二萬爲前鋒導

兀良哈台討平諸郡之未附者攻降交趾收特磨溪洞三十六中
統元年八朝在道卒世祖憫之乃以實為總管守大理賜璽書曰
向率我師往臨爾境重拒國人之請因從城下之盟蟻附而來忠
勤益著庸是至優之典彰以同視之仁可更賜虎符仍領大理鄯
闡威楚統矢會川建昌騰越等城自各萬戶以下並聽信直實節
制至元初烏蠻長舍里威一作利畏結威楚統矢及東方三十七部諸
爨各殺守將以叛鄯闡屯守官不能禦遣使告急實率眾進討大
敗於洱水之濱復遣孛羅攻賊於統矢城又破之遂定統矢是秋
舍里威又以眾十萬謀攻大理詔都元帥也先與實合討師至安
寧擊走之遂復鄯闡降威楚定新興進攻石城肥膩皆克之爨部
平已復下柘城破蠻長什多羅十餘萬眾于尋甸未幾舍里威復
叛實遣石買等詭為商旅執贄往見挺矛刺殺之獲其黨數人

於市於是立郡縣置守令行賦役施政化與中州等緬國擁象騎
數萬寇蒲甘掠金齒南甸欲襲大理實與蒙古萬戶忽都領騎兵
禦之緬眾敗走與其子阿慶入覲帝嘉實忠勤進大理威楚金齒
等處宣慰使都元帥留阿慶宿衛東宮尋尚公主時西南彝初平
獨緬數梗詔實同大兵渡江行至金齒以疾卒其子孫為方伯連
帥者十餘人經世大典云至元十四年緬人因金齒總管阿不內附攻其地時萬戶忽都總
管信昔日方奉命伐承昌蒲驃阿昌之未附者師至南甸阿不來告急忽都等
倍道行與緬軍遇其眾數萬而乘馬次象次步卒象披甲背負戰樓旁挾大竹為筒置短槍數十
子中乘象者取以擊刺忽都見賊眾我軍僅七百人乃分為三隊信直日止領二百三十三騎傳
河而陣戰良久賊退信直日追之抵寨門忽南面賊萬餘繞山我軍後忽都復
列為三陣追至河岸又敗之連破十七砦賊象馬自相蹂死忽都中傷始收兵
也罕的斤匪刺魯人祖匪答兒密立以幹思堅國哈刺魯軍三千
來歸太祖更獻牛馬以萬計授千戶從征回鶻諸國諭降河西諸
城後從攻臨洮死焉父密立火者從太宗滅金又從憲宗攻蜀亦
歿于軍中統三年也罕的斤襲千戶數有戰功下五花石城白馬



元史卷一百一十五 卷一百一十五
等若至元七年宋兵入成都也罕的斤以兵相拒累日宋兵退追擊眉州大破之世祖嘉其功擢蒙古匣刺魯河西漢軍萬戶成眉州從圍嘉定築懷遠砦以守要害宋兵出戰輒敗從圍瀘州攻神等門先登拔之從攻重慶屯佛圖關屢戰克捷移屯堡子頭宋將趙安開門降重慶既平復畧地思州得降將百餘人授嘉定軍民西川諸蠻彝部宣撫司達魯花赤十七年征幹端與叛王元盧等戰勝之拜雲南行省參政與諸王相答吾兒右丞太卜分道征緬造舟于阿昔阿禾兩江得二百艘進拔江頭城命都元帥袁世安戍之且圖其地形遣使詣闕具陳攻守之畧先是既破江頭城遣黑的兒楊林等諭緬使降不報諸蠻復據建都太公城以拒大軍再遣僧往招諭爲所害也罕的斤遂督軍水陸並進擊破之建都烏蒙金齒等西南彝十二部皆降立邦牙宣慰司于蒲甘城振旅

而還位至四川行樞密副使

經世大典云至元二十年王師伐緬九月大軍發重慶十月至南甸太卜由羅必甸進王遣也罕的斤取道阿

昔江達鎮西阿禾江造舟二百下流抵江頭城斷緬人水路王自將一軍從驃甸徑抵其國與太卜軍會破江頭城以兵守之二十二年冬緬王遣使至太公城求納款且乞降旨許其悔過然後差官赴闕朝廷遣鎮西平緬招討使怯烈至其國二十四年春緬王爲其庶子所囚執雲南省臣請俟秋再討帝不從既而王師進至蒲甘喪師七千餘始服欵

怯烈西域人世居太原由中書譯史從平章賽典赤經畧川陝初立雲南行省署爲幕官諸洞蠻長多欵附及分省大理會緬人入寇怯烈卽以戰具資軍士討平之授行省左右司員外郎平章納速刺丁遣詣闕敷奏邊事世祖愛其練達拜鎮西緬麓川等路宣撫司達魯花赤成都烏蒙諸驛阻絕怯烈市馬給傳往來稱便諸王相答吾兒右丞太卜征緬命率兵船爲鄉導拔江頭城獲其銳卒萬人復從雲南王入緬總兵三千屯鎮驃國設方畧招徠其黨由是蠻人復業者衆後入覲世祖詢以征緬始末仍命領詔至緬宣上威德緬王稽顙稱謝遣子入貢官至雲南行省右丞

阿禮海牙畏吾兒人事仁宗於潛邸充宿衛英宗至治初出爲平
章政事歷江廣汴陝四省皆有惠政以父憂解官天歷元年秋文
宗入承大統卽易服南迎至汴郊入見帝命復鎮汴時方多難阿
禮海牙至卽高價入粟以時糧儲命近郡分治戎器閱士卒括民
馬以備不虞先是文宗卽位詔已播告天下而陝西宮尚連結靖
安王等黨附上都起兵東擊潼關阿禮海牙開府庫出鈔二千五
萬緡犒軍河南禦之未幾陝西兵突出潼關四掠迤邐前進河南
告急集省院官屬問計無應者阿禮海牙曰汴在南北之交使西
兵得至此則江南三省之道不通於畿甸軍旅何日息乎夫事有
緩急輕重重莫如足兵急莫如足食今徵湖廣之平陽保定兩翼
軍與吾省之鄧新翼廬州沂邳礮弩手諸軍以備虎牢裕州哈刺
魯鄧州孫萬戶兩軍以備武關荆子口以屬郡兵及蒙古兩都萬

戶左右兩衛諸部丁壯之可入軍者給馬乘貲裝立行伍以次備
諸隘芍陂等屯兵本自襄鄧諸軍來田者還其軍益以民丁使守
襄陽白土峽州諸隘別遣行院官領兵以備自蜀至者購汴汝荆
襄兩淮馬給之府庫不足則命郡縣假諸殷富家安豐等郡之粟
遡黃河運至陝糴諸汴汝近郡者則運之滎陽以達虎牢吾與諸
君各奮義以從王事宜無不濟者衆曰唯命自省院屬吏各部分
行事餽餉之行千里相望阿禮海牙親閱實信以期會由虎牢南
至襄漢無不畢給爲粟二十萬石豆如之甲兵五十五萬芻以萬
萬計是月西兵逼河南謀者來報曰西人北行者度河中以趨懷
孟南行者過武關掠鄧州直趨襄陽破郡邑橫絕數千里將結西
蜀兵至阿禮海牙益督餉西行且設備於江黃置鐵繩於峽口作
舟艦待戰及與西兵遇於鞏昌黑石渡時湖廣所徵太原兵最強

甫至未及食趨之倍道進轉戰及暮兩軍殺傷相當虎牢遂陷軍
儲巨萬悉亡行省院斂兵退至汴民大恐前後遣使告於朝越二
旬不得旨阿禮海牙朝夕出入聲色不動怡然如平時十一月西
師逼城將百里而近阿里海牙召行院將帥與凡在官者告曰吾
荷國厚恩唯有一死以報行院之出唯敵是圖而退保吾城不亦
怯乎然敵亦烏合之衆何所受命而敢犯且吾甲兵非不勁芻峙
非不豐而戰弗利者良由太平日久將校不知兵士卒不習戰使
彼得披猖至此彼誠知新天子之命則衆自沮而散爾今遣使入
朝請降詔大赦脅從者俟詔下募士入其軍明示利害後整大軍
西嚮征之別遣驍將率精騎上龍門繞出其後使之進無所據退
無所歸成擒於鞏洛之間必矣衆亦曰唯命卽日與行院整兵南
薰門外以行會前使者自京還言齊王巴克上都奉天子寶璽來

獻將刻日至京乃置酒高會於省堂相賀爲書告屬郡傳諸江南
三省募士得蘭住者賫書往諭西人猶撈掠之訊以實及朝廷遣
詔使放散西軍之在虎牢者西人雖未解散然各已駭悟又聞行
省院以兵至猶豫不敢進旣而朝廷遣使持檄罷兵靖安王始與
蘭住來請命遂巡解去事平阿禮海牙令從陝西求被俘者歸其
家凡數千人官吏被獲者皆遣還故所後以功拜中書省平章政
事

冊曰鎮危以安從容旁午終以清寧卸甲解組太平浚寧有
功不處雖曰能勞方之未武

答失拔都魯紐璘曾孫也以祖也速答兒戰功得襲萬戶鎮守羅
羅宣慰司順帝至正十一年除四川參政紅巾賊徐壽輝兵起陷
黃州命答失拔都魯從平章咬住討賊襄陵住旣平江陵答失

請自攻襄陽進次荆門賊衆至十萬官軍止三千餘遂以計招募襄陽官吏及土豪避兵者得義兵二萬人編部伍至蠻河賊守要害不得渡爰出奇兵由間道襲其後首尾夾擊賊大敗追至襄陽賊閉城不出乃相形勢內列八翼包絡襄城外置八營軍峴山楚山以截其援答失自將中軍據虎頭山俯瞰城中民受圍久夜半有縋城叩營門者具告虛實願內應答失期以五月朔夜攻城密與約至期民果垂繩引官軍先登者近千人時賊船百餘艘在城北陰募善水者鑿其底天將明城破賊巷戰不勝走就船船壞皆溺死僞將王權領千騎西走遇伏兵擒之襄陽遂平帝賜上尊及黃金束帶官其子孛羅帖木兒爲雲南理問十三年定青山荆門諸寨九月畧均房平穀城攻開武當山寨明年正月復峽州三月遷行省平章兼知樞密院事總荆襄諸軍會潁川妖人劉福通亂

蔓延不可制改命答失以兵赴汝寧十月與河南左丞太不花會軍討安豐復苗軍所據鄭均許三州十二月復河陰鞏縣十五年福通自碭山夾河迎僞主韓林兒立爲帝詔答失爲河南行省平章進次許州與福通戰于長葛敗績將士奔潰至中牟收散卒屯聚賊復夜劫營掠其輜重遂與子孛羅相失賴彰德元帥劉哈刺不花引兵來援斷賊歸路獲其子送歸復駐汴梁十二月整兵進討大敗賊于太康遂圍亳州林兒走安豐十六年十一月攻取福通夾河寨進次高柴店偏太康三十里賊乘夜來劫以有備亟遁明火追之比曉督陣力戰壯士緣城入其郭斬首數萬太康平捷至拜河南行省左丞相仍守汴梁加孛羅帖木兒四川行省左丞十七年入朝加太尉還取溝城東明長垣三縣詔遣知樞密院達理麻失理分兵來助與福通戰敗沒諸軍大潰答失力不支退駐

石村朝廷疑其玩寇使者促戰相踵賊覘知之詐爲答失通好書遺諸路使者果得之以進答失聞知一夕憂憤死子孛羅帖木兒自有傳

察罕帖木兒字廷瑞

紀事本末云姓李氏

系出北庭曾祖濶濶台元帥初隨大

軍收河南遂家潁州之沈丘察罕帖木兒幼篤學嘗應進士舉有時名修眉覆目左頰有三毫怒則毫皆直指順帝至正十一年紅巾賊劉福通作亂所過殘破不數月江淮諸郡皆陷朝廷徵兵致討訖無成功察罕帖木兒奮義起兵沈丘子弟願從者數百人與信陽人李思齊合兵同設奇計襲破羅山賊事聞授汝寧府達魯花赤思齊知府事所在義士俱將兵來會得萬人自成一軍屯沈丘數與福通戰輒捷十五年賊由汴南陷鄧許嵩洛諸州察罕轉戰而北遂戍虎牢以遏賊鋒賊北渡孟津焚掠至覃懷河北震動

察罕引兵奮擊賊敗走河北遂定朝廷奇其功除中書刑部侍郎苗軍以滎陽叛察罕夜襲俘其衆遂營中牟已而淮右賊衆掠汴西來擣中牟營察罕結陳待之會大風揚沙自率猛士鼓譟出擊其中堅賊披靡棄旗鼓走軍聲益大震十六年加兵部尚書繼而汝潁賊黨李武崔德等西陷陝州遂斷殺函勢欲趨秦晉時平章答失拔都魯方節制河南軍調察罕及思齊往擊之卽鼓行而西夜拔殺陵立柵交口陝州城阻山帶河賊轉南山粟給食固守攻之猝不下察罕乃焚馬矢營中如炊烟狀賊畏兵衆不敢逼而夜提兵拔靈寶城賊始覺卽棄陝州渡河陷平陸掠安邑蹂晉南鄙察罕追感至下陽津溺死者衆相持數月賊宵遁以功加僉河北行樞密院事十七年福通遣其黨毛貴陷膠州倪文俊陷陝州李武陷商州由武關逕趨長安至灊上分掠同華諸州三輔震動陝

西省臺來告急察罕即提兵入潼關長驅而前與賊遇戰輒勝賊黨皆散潰走南山入興元朝廷嘉其復關陝功大授陝西左丞未幾賊出自巴蜀陷秦隴據鞏昌潛窺鳳翔察罕先分兵守鳳翔而遣謀者誘賊來圍察罕自將鐵騎夜馳二百里比至去城五里分軍張左右翼掩擊城中軍亦出呼聲震天地賊大亂自相踐蹂伏屍百餘里關中悉定十八年毛貴分道由薊州犯京畿朝廷大恐徵諸道兵入衛詔察罕以兵屯涿州察罕即留兵戍清湫義谷屯潼關塞南山口以備他盜而自將銳卒赴召是時曹濮賊方分道踰太行焚上黨掠晉冀陷雲中鴈門代郡烽火數千里復大掠南還察罕先遣兵伏南山隘自勒重兵屯聞喜絳陽賊果出南山縱伏橫擊賊皆棄輜重走乃分兵屯澤州塞盩子城屯上黨塞吾兒谷屯并州塞井陘口以杜太行諸道河東悉定詔進右丞兼西臺

御史中丞同知河南行院事命守關陝晉冀兼撫漢沔荆襄便宜行事察罕益以平定四方爲已任是年福通等陷汴梁迎僞王號召羣盜自巴蜀荆楚江淮齊魯遼西以至甘肅所在兵起察罕命北塞大行南守鞏洛自將中軍軍沔池會河南行省平章周全叛附福通棄鞏懷入汴合兵攻洛陽察罕令嚴守備別以奇兵出宜陽而自將精騎發新安來援賊至城下見堅壁不可犯潛引去追至虎牢塞成臯諸險而還十九年圖復汴梁以大軍次虎牢先發游騎南道出汴南畧歸亳陳蔡北道出汴東戰船浮于河水陸並下畧曹南據黃陵渡乃大發秦兵出函谷過虎牢晉兵出太行踰黃河俱會汴城下首奪其外城諸將環城而壘賊屢戰輒敗夜伏兵城南日遣苗軍跳梁者畧城而東賊傾城出追伏起邀擊敗之又令弱卒立柵外城以餌賊賊出爭弱卒佯走薄城西因縱鐵騎

突擊悉擒其眾賊益氣阻不敢出八月諜知城中食且盡遣出分掠無復還者乃與諸將各分門而攻至夜將士賈勇斬關入福通挾僞主韓林兒從數百騎出東門遁獲僞后及賊妻子數萬符璽印章寶貨無算保全居民二十萬眾不旬日河南悉定捷聞進河南平章政事兼臺院如故察罕既定河南更以兵分鎮關陝荆襄河洛江淮而重兵屯太行營壘相望數千里日修車船繕甲兵務農積穀謀大舉以復山東時山西晉冀諸地皆察罕所平定而谷失拔都魯之子孛羅帖木兒以兵駐大同陰欲并據晉冀日事兵爭天子屢下詔和解終不聽事見順帝紀二十一年察罕諜知山東羣盜自相攻殺濟寧義兵萬戶田豐降于賊與福通黨王士誠據山東乃與疾自陝抵洛大會諸將議師期發并州軍出井陘遼沁軍出邯鄲澤潞軍出磁州懷遠軍出白馬及汴洛三水陸俱下而自建


大將旗鼓渡孟津踰覃懷鼓行而東復寇州東昌八月師至鹽河遣義子擴廓帖木兒及諸將以精卒五萬擣東平直抵城下察罕以田豐據山東久軍民素服因遺書招之豐及士誠皆降遂復東平下濟寧時大軍猶未渡河賊眾皆聚濟南常出入齊河禹城相擾察罕先遣奇兵取間道出賊後南畧泰安逼益都北徇濟陽章邱中徇瀕海郡邑始自將大軍畢渡進逼濟南城下齊河禹城俱降南道諸將捷亦至再敗益都賊于好石橋濱海郡邑皆聞風送欵圍濟南三月城乃下詔拜中書平章政事兼院臺如故遂移兵圍益都環城列營治攻具百道並進賊悉力拒守復掘重堊築長圍遏南洋河灌城城拔仍命分守要害招集流亡郡縣戶口漸次收復二十二年六月豐士誠陰結賊復圖叛當豐之降也察罕待之不疑數獨入其帳中及是豐將謀變忽請察罕觀營壘眾謂不

宜往察罕曰吾推心待人安得人人防之左右請以力士從不許
 惟帶輕騎十人行至豐營遂為士誠所刺歿于益都先是有白氣
 如索長五百餘丈起危宿掃太微垣太史奏山東當大水帝曰不
 然山東必失一良將即馳詔戒察罕帖木兒勿輕舉未至已及於
 難追贈潁川王諡忠襄

史料云察罕故元別部後思齊
羅山民至今河南廟祀弗絕

冊曰忠義性成勤王領袖始自山東畧平關右坦懷被禍厥
 志不成天覆元祚人力奚爭

卜顏鐵木兒字珍卿唐兀吾密氏性明銳倜儻早備宿衛文宗天
 歷初由太常署丞拜監察御史累擢江浙平章順帝至正十二年
 春斬黃賊徐壽輝遣兵陷湖廣侵江東西詔率軍進討卜顏鐵木
 兒益募壯健為兵得驍勇三千人戰艦三百艘時湖廣也先
 帖木兒江西平章星吉南臺御史中丞蠻子海牙皆以兵駐太平



留不進卜顏鐵木兒至乃與俱前遂復池州已而賊黨趙普勝
 再陷江州官軍俱潰而東安慶被圍益急遣使來求援諸將皆欲
 自守卜顏鐵木兒曰何言之不忠邪安慶與池止隔一水救患之
 義何容緩且上流官軍雖潰然皆百戰之餘所乏者錢穀器械耳
 吾受命總師其可視之而不恤哉即大發帑藏周之潰軍大集兩
 軍勢復振安慶圍始解十三年三月賊復攻池州眾且十萬卜顏
 會諸將謀曰賊表裏連結若俟其壘成而坐食諸縣之粟破之實
 難今新至疲敝如乘其驕惰盡銳攻之則頃刻間功可成矣眾曰
 諾遂分番與戰大敗之乘勝率舟師以進五月與戰于望江又戰
 小孤山及彭澤又戰龍開河賊皆破走進復江州七月克蘄州及
 道士洑焚其柵抵蘭溪口及賊巢黃連砦盡殲之分兵平兩巴河
 于是江路始通十一月與蠻子海牙等諸軍皆會十二月分道進

